

PHARMACO- POEIAE AUGUSTANÆ RESTITUTÆ,

ab

Ejus Autore;

Luca Schröckio, LUC. Fil. Medicinæ
Doctore, & in Patriâ Physico,

suscepta

DEFENSIO.

Qua imprimis Dn. D. Friderici Hoffmanni argumentis, in
Clave Pharmaceutica Schröderiana, contra prædictum Dispensatori-
um, pro Zvelferi defensione, prolatis respondetur; simulque Cujusdam ficto-nomine
vocati Philonis Nasturtij Postscriptum, & hanc respiciens
Schmuziana Antithesis excutitur.




ANNO S. R. M. DC. LXXV.

AUGUSTÆ VINDELICORUM,

Impensis Theophili Göbelij,

Typis Johannis Schönigkij.



THE JOURNAL

OF THE

ROYAL SOCIETY OF LONDON

1850

1851

1852

1853

1854





*Generis splendore, multijugæ Doctrinæ gloriâ,
Artis excellentiâ, Meritorumq; amplitudine
maximè conspicuo
atque verè nobilissimo*

DN. JOHANNI GEORGIO
VOLCKAMERO,
Medicinæ & Philosophiæ Doctori,
Illustris Norimbergensis Reipublicæ Physico,
Fautori meo plurimùm colendo,
SALUTEM!

Enues hæc Pagellas Excellentiae Tuæ inscribo, non ut laudes, quæ debentur amplissimæ, aut illustra, labori indefesso atque humanitati maximæ adscribenda merita, quibus non solum Artium præstantissimæ Filios Tibi divinctos reddidisti, sed & Principum ac Magnatum favorem, multorumque Aliorum amorem & obsequium in Te ubertim derivasti, hac occasione decantem; qui, nullâ ab annorum, longâ quamvis, serie oblivioni illa tradi posse, ac impari commendatione meâ obfascari potius,

rius, quàm condigno splendore exornari, scio; sed quò publico hoc monumento pharmaceutico, quod consummato Tuo judicio eò lubentiùs submittitur, quò majorem dextrè adplicandi medicamenta, eademque, Medico non indignâ operâ, artificiosè elaborandi laudem mereris, quantum Tibi & ipse etiam debeam, testarer; cùm & primos pueritiæ annos prementi, & hucusque incorrupto semper adfectu plurimum favere mihi, dignatus fueris; unde memoriam hujus meo fenescere in animo si paterer, ingratiſſimus omnium meritò dicendus forem.

Sereno itaque vultu exiguum hoc, quod offero, memoris gratique animi indicium (majora siquidem me debere, ingenuè fateor,) accipe, certus, nihil unquam me intermissurum, quod ad Excellentia Tuæ cultum & obsequium proficisci à me poterit.

Interea pro salute Tua DEUM veneror, ut TUIS, quibus nil dulce Te sine esse potest, diu latus atque felix intersis, sicque amore Tuo gratioſo ac prolixâ benevolentia diu amplecti unâ valeas

CELEBERRIMI TUI NOMINIS

*Bib. Augustæ Vind. A.O.R.
cl2, loc. Lxxv. M. August.*

Sincero animo

cultorem addictissimum

Lucam Schröckium, LUC. Fil. Med. D.



LECTORI

Salutem!



Harmacopœjam Augustanam contra Joannis Zuelseri Animadversiones defendere, cum ante biennium & quod excurrit, instituissem, duram me suscepisse provinciam, atque inexpiabiles mihi imminere inimicitias, ipsemet prædixeram. Nec fefellisse me opinionem, ex Postscripto illo adparuit, quod larvatus Philo Nasturtius Censura sua Schmuziana, tunc in lucem emissa, adjunxerat. Imò non defuit ipse D. D. Michaël Raphaël Schmuzius in Antithesti, sive Scripto præfata Censura opposito, me subinde tangere. Ut aliorum dicta & scripta per-versa judicia, cum publici juris facta non fuerint, meramq; invidiam, partim crassam ignorantiam, turgidamvé arrogantiam sapiant, hac vice taceam; quibus utpote tum demum, si aliquando meditationes illæ typis commissæ fuerint, obviari eundum, ac quid magnifici comprehendant, circumspicendum erit.

Illæ verò modò nominatæ Virorum Bigæ tantum absuit, ut me in-fermentum egerit; quin potius leves, ne durius quid dicam, Chartas istas, à Seneca cap. 10. de tranquillit. anim. nihil tam acerbum esse, edoctus, in quo non æquus animus solatium inveniat, cum quadam animi delectatione intuitus fuerim. Salvam etenim rem meam esse, mihi persuadebam, ideoq; gratulabar, cum nil nisi turpia, inania & male sana verba proferri viderem, tantæ virtutis, ut idem præstitum fuisset, si planè tacuissent.



Quamvis hac arte aliorum similis farina Zoilorum animum titillari, facile credam, ut vel hac ratione non planè frustra laboraverint Typographi. Sed quis tantillum gaudij ipsis invideat?

Horum igitur intuitu nolui me hæcenus nugis istis opponere, intò nec calamum contra eas unquam strinxissem, nisi nuper demum alia occasio manibus eundem imposuisset. Ut ita vel paucis saltem, quæ circa hoc negotium monenda esse, occasio nunc jubet, indicare, ne silentium, meum pusillanimitatem, aut de justâ victoriâ desperationem Momorum facundia interpretaretur, sibiq; ipsis sapere viderentur, æquum duxerim. Et jam, quod in fine Pharmacopœjæ Augustanæ Restitutæ posui, me scilicet unicuique dictam Pharmacopœjam invasuro, mox debito responso non esse obviam iturum, sed unâ fideiâ duos pluresvè dealbatum iri parietes, adimpleam; novo quidem me periculo, invidorumq; et adversariorum sarcasmis, tum qui infami scripto exagitare me propterea, vix cessabunt, tum similem et extortum certandi modum, ceu mera convitia redolentem, ipsi Convitiatorum maximi, proclamabunt, ita exponens; sed nihilominus æquo animo imperitorum istorum convitia auditurus; quia, ad honesta vadenti contemnendum esse ipsum contemptum, sapientis Seneca, epist. 76. consignatum, monitum semper infixum animo hærebit.





Rescriptum ad PHILONEM NASTURTIUM.

Lucifugæ hujus *Poscriptum*, in Vernacula elaboratum, eandem in sui excussione ut adhibeam, quamvis deposcere videatur, nolui tamen alio, præter communem illum Eruditorum interpretem, Latinum, uti stylo, cum eodem *Pharmacopœja Augustana* Restitutionem peregerim, ut adeo in alium prodire forum inconsultum reputem.

Quo verò modo respondere Antagonistæ huic deberem, longum dubitavi, tandemque omnium optimum fore judicavi, si percurrendo saltem, unum alterumvé, quod moneri præcæteris dignum foret, producerem. Singulas enim lineas, aut verba excutere, ipsaque convenientibus notis illustrare si vellem, chartam inutiliter perderem, & Lectori nil nisi tædium, mihi verò nullum patrociniū pararem; cum præter fabulas, scommata, & effrenem cavillandi libidinem, parum ferè contineant aliud; adeo ut exhibuisse ista, sit refutasse. Imprimis cum Autor, pessimæ causæ, quam agit, dubio procul diffusus, nomen adponere suum timeat, imò nec Typographi, locique, cui egregius hic fœtus, sive libellus famosus, unice dignus, qui inutilium *schidiorum*, ligniq; instar putridi Vulcano consecratur, natales

natales debet, contra sacram Imperialium Constitutionum voluntatem, nomen fuerit additum.

Quamquam hæc omnia tam occultè haud fuerint peracta, ut non Autoris nomen mihi, de Typographo tantopere haud sollicito, innotuerit; quem scilicet eundem esse, non unâ Amicorum fidâ relatione compertum habeo, qui *Friderici Mülleri* sub nomine, in *Umbra rediit Zvelferi*, Augustanum Medicorum Collegium impudentissimè adlatrare ausus fuit, eoque stimulum, ad moliendam Pharmacopœiæ nostræ Restitutionem, tunc ob rationes olim adductas nondum susceptam, mihi addidit.

Sed cum ipse Autor nomen suum tenebris damnaverit, nec à me luce dignum æstimabitur.

Quò tamen larvam sibi detractam, experiatur, meoque me stare promisso, quod *pag. 5. præfat. Pharmacop. August. Restit.* occurrit, videat, aliqua per jocum hîc illîc profero, ex quibus abunde, quàm minimè lateat, cognoscat; idque non tam cavillandi eum, quàm potius ad meliorem mentem perducendi causâ, atque ut discat, vel planè nihil, vel, si non proprio sub nomine, rationi & humanitati saltem congrua, in posterum proferre. Erudito siquidem Orbi, cujus pars esse desiderat, quam ipsi laudem, si fortè mereatur, haud detraham, nondum innotuit, nec, præscripto modo ubi sese gesserit, publicè unquam hac in causa à me nominabitur, sed potius, edito scripto ad novum certamen literarium si fortè me alliceret, ita, ac si nunquam me violasset, excipietur. Aliàs publicam larvæ deductionem, ubi ita visum fuerit, polliceor. *Zvelferi* defensio ubi peragenda est, annon majori cum honore, atque successu laudabiliori, absque infernali calumniarum & convitiarum veneno illud fieri potest? *Zvelferi* sanè causa aliàs suspecta saltem magis magisque redditur; prout *Philonis Nassturtij Postscriptum* exempli loco inservire potest.

Hujus paginam primam, cum præter scommata, meram exhibeat fabulam, intactam Autori remitto.

Nec altera, quæ sequitur, alicujus est momenti, meris referta nugis; dum ex. gr. in fronte *Pharmacopœjæ Augustanæ Re-stituta* positum Emblemata exagitant, iconem, quâ *Pharmacopœja*, & quidem *Augustana*, oculis exhibetur, ipsam augustam Urbem nostram interpretatur, insignia ejus uvam esse somniat, ex *Paracelsi* verò adposita statua Apotheosin ejusdem stupidè collegit.

Lineâ ultimâ, nec non paginâ tertiâ *Lucis* me filium adpellat. Quod licet illo: *Luc. Fil.* non indigitaverim, cum omnes vel modicè eruditi faciliè, quid denotet, perspiciant, non unam tamen ob causam epitheton hoc admitto, de quæ sponte oblato Antagonistæ honorifico testimonio mihi gratulor. Et utinam eodem *Nastutium* quoque condecorare liceret, qui potius tenebrio, id est, qui tenebras amat, proprii nominis indecorâ obscuracione, insigniri cupit, calumniarum quæ & convitiis effusione, non *Lucis*, sed Principis tenebrarum & omnium calumniatorum *Coryphæi* se esse filium, ostendit!

Paginâ tertiâ nova sistit deliria, quæ inibi, si cui liber, evolvantur. In fine autem *Friderici Mülleri, Viennensis olim Pharmacopœi*, causam agere incipit. Ubi pietatem *Philonis* laudo & extollo; quippe benignus ipsi erat *Müllerus*, stipendium, uti refertur, annuum, à *Zwelfero* pro famæ suæ scriptorumque defensione constitutum, amicè in ipsum derivans, sic quæ in alienæ libidinis mancipium *Philonem* transformans; ubi, si viveret *Terentius*, denuo exclamaret: *His nunc præmium est, qui recta prava faciunt.* Quamvis *Zwelferi* causam, tali fulcitam patrocinio, satis infirmo stare talo, cum virtus, & quæ ei militat, veritas, istâ non indigeant defensione; & sat habeat Favitorum semper, qui rectè facit, primâ statim fronte suspicari quis faciliè possit; *Nasturtius* autem illorum è numero se esse prodit, quærendam pecuniam

primum esse, virtutem post nummos, qui judicant. Quos Philargyros non facile, nisi cessante lucro, saniolem recuperaturos mentem, sicque apologiâ hac novam me calumniæ materiam *Zvelseriano stipendiario*, modò cum *Müllero* ipsum quoque stipendium non animam dimiserit, parare, est credibile.

Paginâ quartâ scopum deserit, & vel præter opinionem *Müllerus Nugatorum coryphaeus* (sic enim *Cryphaeus* legendum puto,) ipsi dicitur; prout verborum constructio clarè illud indicat.

Elogio hocce postquam *Müllerum* suum mactavit, indignatur, me, cum modò nominato Patrono suo arenam ingredi, recusare, ac præ fervore talia eructat, quæ omnem ipsi periisse pudorem, omine pessimo, loquuntur, indignumque planè cum reddunt, qui *Hippocratem* suum Patronum, uti *paginâ secundâ Postscripti* illum salutatur, jure ampliùs vendicare queat; cùm is *libr. de Medico* requirat, ut animum modestum habeat arti isti operam navans, ac honestis moribus sit præditus. Et in *jurejurando* à suis exigit, castè & sanctè ut vitam suam conservent.

Rationes etiam meas, ob quas *Mülleri* certamen detrectem, adducit atque perstringit; quia scilicet: 1. *disputare cum homine à μύσω indecorum*. Ubi non eâ, qua decet, ingenuitate, ceu etiam in aliis, verba mea proferuntur. Minimè etenim hunc in modum scripsi; sed, uti *pag. 11. præfat.* videre est: *disputare cum homine à μύσω, indecorum, frustraneum est*. 2. *quia in dispari professione indecorum alienæ sese ingerere messî*. Quæ verba nullibi in meo Opere reperiuntur; licet alia similia, modò ritè explicentur, inibi occurrere, haud contradicam. 3. quia *Umbræ redivivi Zvelseri Müllerum* autorem non agnoscat; hoc enim ista eleganter prolata verba: *Die Umbræ Zvelseri hätte Müllern nicht gedienet* sibi velle, divinare si licet, autumo. Verùm uti haud inficias eo, cum *Müllero* disputare me noluisse: ita rationes quoque, ne factum

factum hoc sinistrè quis interpretari queat, repetere necesse
duco. Primaria itaque fuit, quia, Augustanos protervè satis
provocantem Müllerum adlocutus, disputare cum ipso, tanquam
homine ἀμύσῳ, indecorum & frustraneum judicavi, veluti pa-
gina cit. *Præfation. mea* habet. Et pag. seq. 12. idem sic repetij :
*Audivisti credo, tecum, tecum, inquam, ἀμύσῳ, disputando congrédi,
indecorum esse & frustraneum.*

Neque ullâ reprehensione dignum hoc esse, modò quæ
contra Müllerum in *Præfat. mea* attuli, perpendantur, facilimè ob-
servabitur. Müllerum enim pro indocto, sive artis disputandi
ignaro habui, Umbrâ Zvelferi redivivî, quam suo sub nomine pu-
blicavit, permotus.

Quod ut clariùs evadat, Philonis iniquo urgente calamo,
binis exemplis denuo confirmo: 1. Postquam Schmuzius pag. 2.
Prodromi proœmialis in apologiam Anno 1671. evulgatam, scri-
psisset, vicisse se, præter rei magnitudinem & auctoritatem,
etiam Virorum doctissimorum & de Republica Philosophico-
Medica apprimè meritissimorum indefessum stimulandi ani-
mum, ut scilicet Zvelfero se opposeret; indè sic dictus Müllerus
in *Umbr. rediv.* Zvelf. colligit, ab Augustanis Medicis indefessum
istum stimulum prodiiisse; dum pag. 6. clientes Schmuzij Augu-
stanos vocat; & pag. 7. Collegium Augustanum Schmuzij se
concredidisse tutelæ, adserit. Sed quàm longè hoc ab omni
veritate abeat, *Præfat. mea* pag. 6. &c. pluribus demonstravi, ipse-
que D. D. Schmuzius in *Antitbesi Nascurtium* idcirco arguit men-
dacij. Videamus jam egregium ratiocinium: Schmuzius apo-
logiam pro Pharmacopœja Augustana scribere tentavit, E. Au-
gustani se ejus tutelæ concrediderunt.

2. Clar. D. Otto Tackenius in suo *Hippocr. chim.* Zvelferum op-
pugnavit. Ansam hinc Augustanos, Schmuziumq; invadendi
arripit Müllerus pag. 16. *Umbr. Zvelf. rediviv.* dum eos adloquitur:

Subornatis praeclaros Viros, & doctos; de quorum numero D. Takenius. Quod an veritati non contrarietur, pag. 11 & 12. Praefat. Pharmac. August. Restit. docent. Ipsum verò lepidum argumentum hoc est: Takenius Zvelserum oppugnavit. E. Augustani Tackenum subornarunt.

Quis unquam similes concludendi modos adprober? An non homine erudito, atque ad disputandum alios provocante sunt indigni? An ergo adhuc dubitas, *Philo*, *Müllerum* tuum, quem in scenam protraxisti, hominem ἀμύμον, id est, indoctum, qui disputare nesciat, optimo jure audiisse? Fateberis utique, si non planè depudere didicisti, cum tali, qui excolendo huic studio artibusque liberalibus operam haud navavit, disputare, & quidem eo modo, quem tuus ille crepat, syllogismos utpote formando, indecorum esse, & quod in *Postscripto* tuo omittere non debuisses, frustraneum.

Interim non nego, posse artem istam in Pharmacopœum cadere, atque cum tali in arenam disputatoriam, si è re videatur, alios descendere. Sed *Müllerum* caruisse illâ, & fama retulit, & prolata modò, nec non alia exempla comprobant.

Objicit autem *Nasturtius*, *Müllerum* esse Virum eruditum, latinitatis benè peritum, ab omnibus diu adprobatum, &c. mea verò scripta demum, examini subjecta quid valeant, edoctura, (modò *Philonis* ænigmate obscuriora verba sensum hunc habere debeant,) videturque in arte pharmaceutica, ac in specie chemicâ, majorem Müllero, quàm mihi, vel parem saltem tribuere peritiam. Quæ cuncta si aliquàlitter concederem, nondum tamen *Philoni* palma cederet. Fuerit enim *Müllerus* Pharmacopœus, in conficiendis pharmacis probè, quod quidem me latet, eruditus, & qui latinam linguam benè, quod alij, qui frequentius ei adfuere, non credunt, calluerit; propterea tamen non statim artis disputatoriæ eum fuisse unà peritum, sequitur.

quitur. Mihi quidem singularem pharmaceuticam scientiam non adscribo, talem tamen absque vana ostentatione tribuo, qua errores *Zwelferianos* detegere valui; quos dam *Müllerus*, patrociniū *Zwelfero* præstans, haud observavit, (modò sciens volensque eos non dissimulaverit,) de commendata illa peritia, magnum animo meo scrupulum iniecit, non prius eximendum, quàm si *Philo* noster omne id, quod erroris in *Zwelfero*, ex propriis ut plurimum ipsius fundamentis, insinulavi, ritè sese habere, contra objectiones meas demonstraverit. Adeoque tantum abest, ut ab omnibus adprobatus dici mereatur. *Philoni* quidem utique adprobatum esse *Müllerum*, promptè credo; quo tamen vix assentatoris nomen effugit, qui, juxta *Gnathonis Terentiani*, *Eunuch. act. 2. scen. 2.* descriptionem, illud genus hominum, qui esse primos se omnium rerum volunt, nec sunt, consecratur, eis ultro arridet, & eorum ingenia admiratur; quicquid dicunt, laudat; rursus si negant, laudat id quoque; negat quis, & ipse negat; ait, & ipse ait; postremò sibi met imperavit, omnia assentari. Nam is quæstus nunc est multò uberrimus. Siquidem

*aurea nunc verè sunt secula, plurimus auro
venit bonos, auro conciliatur amor.*

Tandem eadem paginâ quartâ dum *Müllerum* extra orbitam potentiæ, congruentiæ, minùs talenti fecisse nihil, instat, me non planè refragantem habet. Utique enim & ipse fateor, quòd *Müllerus* nihil extra orbitam potentiæ aut talenti fecerit, quia multoties jam nominatam *Umbram* haudquaquam elaboravit; sed nomen unicè suum, idque satis incongruè, præfigi curavit.

Quæ subjungit paginâ quintâ: *agitatus causa Pharmaceutica & Spagyrica, ventilantur Animadversiones &c.* omni sensu destituntur; adeoque transeant, usque dum clariora aliquando revertantur.

Cæterum ut de *Müllero* quæ vera sunt & laudabilia, eloquar, cum id mereatur, admonet. Prius uti hætenus observavi: ita etiam si *Nasfurius* tacuisset, sponte in posterum quoque non intermisissem; quamvis veritas magnum mihi jam pepererit odium, ipseque *Philo* noster iniquissimum calamum contra me, dum veritatem pro virili amplector, acuerit. Posterius si pari promittunt liceret promittere, equidem foret gratissimum. Nemini enim debitam laudem unquam detrachere animus est, atque calidè desidero, ut omnes nihil agere præsumant, quàm quod laudabile revera existit, ac ita de cunctis pariter nihil, nisi quod ad eorum spectat gloriam, scribi dicivè possit. Ast de *Müllero* laudabilia, simulque vera eloqui, mihi quidem hac in materia, quæ jam in disceptationem venit, impossibile videtur. Si enim v. gr. *Müllerum* titulo libelli, *Umbra Zelferi redivivi* inscripti, nomen tantummodo suum mutuo dedisse, ipsum verò libellum alterius esse ingenij fœtum, dicam, vera, & quibus nec *Philo* directè contradixit, profero, sed non in laudem ejus vergentia. Primas itaque semper apud me tenebit veritas, cui si *Mülleri* &c. commendatio non repugnet, parem hæc quoque locum inveniet; aliàs pristinum haud mutaturus sum genium. Rectius interea facturum esse *Nasfurtium*, statuo, si quem fata jam vivorum consortio exemptum voluerunt, *Müllerum* simili deprædicatione tantopere efferre, in posterum omiserit; cum aliàs novam saltem contradicendi materiam exhibeat, sicque *Müllerianæ* famæ pessimè consulat.

Paginâ sextâ Animadversiones in *Pharmacopœiam Augustanam Restitutam*, vel etiam Ejusdem commendationem, quorum neutrum tamen videre adhucdum licuit, promittit; desiderioque noscendi Schmuzianum Interpretem, quem ipsum esse *Schmuzium*, ex stylo ejus fit verisimile; patefacto, frigidam admodum, & jam sufficienter in *Præfatione mea* rejectam cantilenam.

nam instituit, objiciens, Collegium nostrum Amplissimum, si refutare *Zvelserum* voluisset, antequam is vivere desit, illud prosequi debuisset, cum provocare mortuum non adeo placere queat; quanquam victoria facilius sic impetretur. Sed quid integrum Collegium nostrum adducit, Cujus nec auxilium, nec consilium ad *Pharmacopœje Augustane* Restitutionem accessit; cum solus laborem illum in me sponte susceperim? Quare pag. 4. *Præfat.* neminem sibi imaginari debere, Collegio nostro instigante, opus hoc me perfecisse, & ideo, si in aliquo aberraverim, mihi, non Illi imputandum esse, clarè satis edixi, jamque obliviosi aut dissimulantis *Philonis* in gratiam repeto. Num verò ullam in hoc culpam commiserim, aut scurrilem, *Nasturtij* reprehensionem meritus fuerim, pag. cit. 14. *Præfat. mee* judicet. Mortuum quidem jam tum fuisse *Zvelserum*, quis nesciit? At redivivum eundem promisit sic dictus *Müllerus*, Umbra illius jam tum comparente; ut itaque defensionem ipsi haud deesse, probè sciverim; imprimis cum annuo stipendio, pro *Zvelsero* ejusque scriptis defendendis, *Philoni* nostro prospectum fuerit. Si tamen petulanti isto sarcasmo digni sunt, qui aliorum, jam mortuorum sententias & scripta examinare, provocati instituunt, eodem sanè, imò majori suum dilacerat *Zvelserum*, omnes quasi Medicos jam dudum defunctos, *Excell.* imprimis *Mindererum nostrum*, animadversionibus suis inhumaniter invadentem, & quidem à nemine Augustanorum provocatum, imò ne verbulo violatum. Me verò impudentissimus *Mülleri*, & Adseclarum strepitus, quo Collegium nostrum, Cui tum nomen meum dederam, ad defendendum Dispensatorium Patrium, ac confutandum *Zvelserum*, malefani provocarunt, atque incitarunt, arma literaria induere coëgit.

Omnem itaque frontem exiit *Nasturtius*, sub *Mülleri* enim umbra latitans, ad certamen subeundum Augustanos acriter provo-

provocavit : jam dum Illorum è numero eidem me committito, convitiis excipit. Quem quidem Cavillatoris impetum eo, quo decet, modo excipio, meras nugas in Autoris infamiam cedentes esse, aestimans.

Quanquam vivo adhuc *Zvelfero*, studia mea eò si perduxissem, ut *Pharmacopœja Augustana* Restitutionem moliri licuisset, Reformatorem neutiquam pertinuissim ; imprimis cum alieno ipsum calamo certasse, præter documenta alia, *Höferus* publicè notaverit.

Postremâ pagellâ, ulteriori me debere cum *Zvelferianis* certamini committere, proclamat, dum detrectare me illud *nasutulus* Advocatus (si talis dici queat) ex verbis, pag. 559. *Pharmac. August. Resl.* positis, evincere tentat. Quæ tamen non illâ, qua virum bonum decuit, fide adducit, illud, quod maximè ad rem facit, præter vitiosam unius alteriusque verbi positionem, planè omittens. Sic enim me scribentem fingit: *Nemo tamen sibi persuadeat ne unicuique Pharmacopœjam hanc restitutam invasuro, debito mox responso esse obviam iturum, totam enim vitam, continuis litibus transigere nolo. Et si qua nova contra Dispensatorium nostrum cudentur objectiones, easdem oppugnare neutiquam tenebor. Ipsa autem in fine cit. pag. expressa verba ita genuinè se habent: Nemo tamen sibi persuadeat, me unicuique, Pharmacopœjam hanc restitutam invasuro, debito responso mox esse obviam iturum; totam enim vitam continuis litibus transigere, nolo. Unâ fidelâ duo pluresque parietes dealbari poterunt. Et si qua novæ contra Dispensatorium nostrum cudentur objectiones, easdem necessario oppugnare, neutiquam tenebor. Jam ex utriusque collatione quilibet ipse cognoscet, quàm perfidè, malè narrando verba mea, Philo larvatus totum moniti mei sensum depravare laboraverit. An*
pugnans

pugnam istam detrectavi? Annon potius, cuivis Zoilo & *Nasutulo* non esse me debitum responsum mox paraturum, indicavi, sed tum demum, quando duo, pluresvé eorum, litem mihi intenderint? Ut autem novas contra Dispensatorium nostrum culas (etenim tales fieri posse, nemo est, qui dubitet,) objectiones, nec à *Zvelfero* ortas, si quando tales prodirent, necessario oppugnem, neutiquam obligatum me volo. Ast quarum Animadversionum *Zvelferianarum* Examen jam suscepi, ubi illud rodere & evertere quis audebit, si à veritate defleat, vindicem me, quamdiu spiritus hos reget artus, experietur. Quamvis, ut denuo inculcem, debito responso mox obviam ire, neutiquam propterea obstrictum me reddam, cumprimis ubi levibus tantum istiusmodi, qualia *Nascurtius* produxit, argumentis, me quis adgredietur.

Ultimi paragraphi initium novis onerat nugis, denuoque *Müllero* succurrere satagens, me hortatur, ut placidè cum *Müllero*, quem inquietare non debuissèm, agam, & ita civiliter me tractatum iri, promittit. Volenti, ut proverbium loquitur, non fit injuria. *Müllerus Umbrâ rediviivi Zvelferi* tranquillum Augustanorum animum, longumque silentium inquietavit, & eos ad pugnam invitavit, ac ita quietem, qua gaudere aliàs tutò potuisset, sibimetipsi inturbavit. Paratus nihilominus sum, placidè in posterum cum *Müllero* agere, modò severiorem calamum importuna *Naslurtij*, alteriusvé facundia, eundem in mei opprobrium nimis commendando, non extorqueat. Salva autem res tum demum erit, si consueto hactenus inurbano scribendi genere omisso, civili potius stylo Adversarij me adorientur, aque convitiis sibi temperabunt. Quod eò magis à se ipsis ut impetrent, studere tenentur, quò certiores sunt, me non nisi coactum, ingratam quandoque animadversionem, protulisse; cum aliàs ab illâ haud difficulter abstineam. Hinc

ipse quoque *Nasfurius* pag. 5. & 7. mirem meam scribendi rationem, ad invidiam usque, commendare fuit permotus.

Quæ de salibus, alcalibus, spirituum actione & reactione proruli, ex *Tackenio* desumpta esse, cavillatur. Sed non sufficit, simpliciter ita, & absque diligentiori consideratione plagii aliquem accusare; verum etiam probandum est. Hoc quidem non diffiteor, & ipsa *Pharmacopœja Augustana Restituta* id eloquitur, multa ex eruditis *Clar. Tackenij* scriptis me desumpsisse, & contra *Zvelserum* adhibuisse; semper tamen, ubi opus fuit, loca signavi, ex quibus illa promanarunt, veluti pag. 277. de alcali urinæ volatilil cum aceto destillato unione, pag. 386. &c. de mercurij, in aqua forti soluti, emplastro de ranis additione, pag. 507. de spiritu viridis æris idem testantur. Tantumque abest, ut illa cuncta de salibus, alcalibus, atque spirituum actione & reactione *Tackenio* debeantur, ut non etiam aliqua aliis ex Autoribus, qui ante *D. Tackenum* scriptis suis in publicum prodierunt, emanaverint. Unicus exempli loco sit *Helmontius*, cui suam debere doctrinam *Tackenum*, *Zvelserus* (modò non ipse, *Philo*, personam istam finxeris,) in *Apolog. contra ipsum* audacter sæpius objicit. Imò plurima circa materiam illam proferuntur, quæ partim in *Tackenio* non reperiuntur, partim etiam *Ejusdem* scriptis contraria nonnihil existunt. Neque enim adeo me alterius opinioni mancipare unquam volui, ut non dissentire interdum, audeam; neque *Cl. Tackenius* ægrè illud pertulit; cum modestè divortium ab aliis facere, vitio nemini debere verti, probè intelligat, juxta illud:

*Diversum sentire duos de rebus iisdem,
incolumi licuit semper amicitia.*

Sed qua in parte aliam ego sententiam foveam, *Philonis* in gratiam exponere, haud est necesse, facileque ex utriusque scriptorum collatione perspicere quilibet ipse poterit. Sufficiat,

ciat, illa, quæ pro *Dispensatorij Augustani* defensione, librorum variorum non segni evolutione, fideli Præceptorum informatione, & pyrotechniâ edoctus, attuli, negotio huic sic me adaptasse, ut satis cum Adseclis, tu *Philo*, habeas, quæ solvas, si *Zwelferum* tuum saluum desideres. Tuus autem *Müllerus*, cujus ingratiā de me vindictā hîc sumere voluisse videris, utique fuit meritus, ut pag. 5. *Præfat. mea* palam de eo scriberem, *Umbra* *redivi* *Zwelferi* alium, non ipsum, agnoscere autorem, & scriptum tuum si tu repetas, nihil nisi inane nomen, instar ridiculæ illius *Æsopicæ* corniculæ deplumatæ, *Müllero* remanere. Ignosce, quòd denuo hoc repetam; siquidem non fieret, nisi toties ansam reiterandi suppeditares.

Cæterum in *sine Postscripti tui* egregij quòd me amare, verbis contesteris, reciprocum amorem spondeo, inque ejusdem signum, cum crassos humores pectus tuum obsidere, ac philtrum aureum *Zwelferi* Te quodammodo demontare, atque animum ad meliora excolenda torpidum reddere, observem, verus *Nasturtij Amicus* ut fias, animitus voveo, ideoque mediante præsentî Apologiâ, salutare hoc & specificum *Nasturtij* remedium adplicare tibi volui; quod acrimoniâ suâ licet aliàs molestum esse queat, siquidem à *narium* tormento nomen obtinuisse, *Plinius lib. 19. hist. nat. cap. 8.* perhibet, *nares* tamen tuas, magnopere torquere non posse, firmiter mihi persuasum habeo. Vale.



M. Acc. Plantus Mostell. act. 3. sc. 2.

Ut homines sunt, ita morem geras.

Quæ
in

Antithesi sua

ad

PHILONEM NASTURTIVM

Anno M. DC. LXXIV.

DN. MICH: RAPHAEL SCHMUZIUS,

à Poystorff &c.

Philosophiæ & Medicinæ Doctor,

contra me

diversis in locis protulit,

LEGI.

L. Ann. Seneca libr. 3. de ira cap. 36.

Noli congregari cum imperitis. Nolunt discere, quæ nunquam didicerunt.

ENUCLEATIO DUBIORUM

Dn. D. Friderici Hoffmanni.

Scribō nunc agere, eruditus, & ad modestiam compos-
itus D. D. Friderici Hoffmanni, Medici Ducalis Saxonici,
calamus requirit, quo nonnullas contra *Zvelserum* à
me prolatas animadversiones, in *suis ad Schröderum*
notis impugnare, atque *Zvelserum* vindicare instituit,
requirit. Cujus tamen sententiæ, laudabili sanè proposito,
tantopere additiùs haud est, ut non sæpius ab ejusdem placitis
recedere, imò argumenta, à me in *Pharmacopœja Augustana*
Reslituta producta, sua facere, ac *Zvelsero* opponere voluerit.

Cæterùm plura in notis istis deprehendo, quæ *Examine*
meo Zvelseriano contrariantur; cùm verò solo argumentorum,
ab ipso *Zvelsero* promanantium, robore nitantur, oppugnare
illa, non est animus; ne actum agere velle videar; siquidem
in *præfato isto Opere meo*, abunde iis jam satisfeci; ut adeo unicè
illa, quæ novo ariete *Pharmacopœjam meam* petere videntur, ami-
cè perpendere atque examinare constituerim.

CAPUT I,

de Balsamis odoriferis.

Primò se offerunt Balsama odorifera, de quibus *pag. 56. 57.*
Dn. D. Frid. Hoffmannus agit, nec *Zvelseri* ineptam esse cen-
suram, adserit, dum is *pag. 445. animadvers. in Pharmac. Au-*
gustan.

gustan. ceram & sebum agninum inutiliter planè & perversè pro corpore Balsamorum adaptari, judicat, eò quòd, cum cera quæ parantur, tractu temporis exiguo tenacissima fiant, quæ autem sebum agninum recipiunt, brevi rancescant. Cui animadversioni *pag. 497. 498. Pharmacop. August. Reslit. me.* nucistæ licet expressum oleum minimè capropter pro hoc usu excludendo, opposui, haud negari posse, inquiens, Balsama hæc tamdiu salva non persistere, ac illa, nucis moschatae oleum expressum recipientia. Sed propterea ceram, & sebum agninum, planè, tanquam inutilia, & perversè adaptanda, rejicere, ineptam esse censuram, defendere adhucdum sustineo. Hinc Balsama, quæ non ita diu adservantur, sed pro usu mox adaptantur, tolerare eadem optimè posse, scripsi. Neque enim, cuncta sunt officinalia, siue quæ tempore quolibet in officinis jam parata habentur, sed etiam extemporanea dari, uti cephalica, stomachica &c. quæ in rem præsentem, pro ægroti & morbi conditione, huic vel illi individuo mox adplicanda, à Medico præscribuntur, est notissimum. Et in his utique ceram & sebum pro oleorum incorporatione adhiberi posse, nemo præfractionè negabit; cùm enim mox in usum trahantur, neque rancori, neque tenacitati, cum tempore demum paulatim emergentibus, sunt obnoxia.

Quamvis nec priora illa sebum & ceram, pro concilianda oleis desiderata consistentia, planè excludant. Ipse enim Pharmacopœus, rerum suarum satagens, odorata ista Unguenta in ea tantum parat copia, quam certo tempore se posse consumere vel dispensare autumat, antequam ea labem contrahant. Id quod uti in aliis pluribus medicamentorum generibus: ita etiam in hisce Balsamis locum invenit; ceu exempli loco *Acceta medicata* esse possunt, quibus de *Dn. D. Frider. Hoffmannus pag. 44. mecum ex Pharmac. August. Reslit. pag. 312. conientit, posse illa,*

illa, pro dispensationis usu quotidiano, confici cum aceto simpliciori, si, aliis non neglectis cautelis, nimia in copia non præparentur.

Quoniam cum cera alba, utpote quæ hîc indigitatur, Balsama elaborata, satis diu (benè clauso in vasculo, ne olea, quibuscum cera in iusta quantitate fuit subacta, exhalare tam promptè queant, quibus scilicet in auras abeuntibus, ceræ tenacitas subsequitur, ipsa etiam destillata olea, avarâ manu non adhibita, si genuina existant,) consistentiam debitam retineant, nec tenacitate exosâ inficiantur.

Non minùs olea balsamica legitimè destillata condimentum quasi sunt sevi agnini, quo rancoris & corruptionis acceleratio impeditur, cumprimis si pariter in ritè obserrata pyxidula adserventur, sebumque ipsum recens & ab adjuncta humiditate prius liberatum fuerit. Quod uti per se etiam diu satis incorruptum persistit: ita multò magis balsamicis oleis maritatum, rancorem tam promptè haud experitur, imò in thecula argentea & deaurata sic conditum sebum per longum temporis spatium in marsupio incorruptum gestari, experimentum ideo institutum fidem mihi fecit.

Cum cera alba quoque & oleo succini confectum Balsamum, prout tale quovis tempore Augustæ solet prostare, per plures menses consistentiâ debitâ se commendat, ita ut in illinitione nullam tenacitatem aut conglomerationem ostendat, sed instar butyri potius, manui inunctum, resolvatur.

Quam verò *Dn. Hoffmannus*, præter sebum agninum, adducit vituli medullam, eam defendere in me non suscipio, cum neque in *Pharm. August. Restit.* mentionem ejus fecerim, neque citius multò præ sevo eam corrumpi, negare velim.

Quin cum Balsama hæc reipsa nihil aliud sint, quàm Unguenta, hæc autem potiori ex parte butyrum, vel simile quid

unctuosum, rancorem concipere aptum, habeant admistum, omnia ista hac ratione ex Officinis & usu medico eliminanda, aut saltem butyrum &c. inutiliter & perversè, ut censuræ Zvelrianæ verbis utar, ipsis misceri, animadvertendum esset; quod tamen à *D. Hoffmanno* haud fieri, ex pag. ejus 122. colligitur, ubi adductorum à *Schrödero* Unguentorum nullum, excepto *Crollij Sympathetico*, censuram vel animadversionem mereri, expressis verbis fatetur; cum tamen *Unguentum cardiacum F. F.* (ut alia, præteream) ex integris libris octo butyri recentis, cui M. xviii. diversarum plantarum incoquuntur, consistat, & ita præ Balsamis nostris odoriferis multò faciliùs, tum quia butyrum ipsum faciliè rancescit, tum aliqua saltem herbarum terrestres particulæ, minimè autem olea destillata corruptionem inhibentia, butyro imprimuntur, corruptionem subire debeat.

Utrum autem destillatis oleis arctior cum nucis moschatæ expresso oleo, quàm cum cera, intercedat unio, jam non disquiram; illud tamen symbolicum adeo ipsis haud esse, scio, ut non olea destillata, aëri liberiori aditu concessio, à nucis moschatæ corpore avolent, symboloquæ valedicant.

Præter discussam hanc censuram, ratione coloris Balsamorum aliam *D. D. Frid. Hoffmannus* subnectit, cujus scilicet impetrandi causâ ipsa herbarum aut florum magisteria, juxta normam à *Zwelfero* traditam, addi posse, statuit. Ego verò *Zwelferum* ex *Zwelfero* reformaturus, & ita fundamento saltem *Zwelferiano* innixus, pro tinctura ista inducenda non commodè adhiberi illa, quòd statuere liceret, monui; siquidem *Zwelferus* non tam ad pulchritudinem, quàm ad virtutes & efficaciam salubriorum medicamentorum prospiciendum esse, judicavit; Magisteria autem illa esse corpora emortua, & dum humida sunt adhibenda, oleorum, ipsis & corpori commiscendorum, quantitatem, à quibus tamen præcipua energia Balsamorum, depen-

dependet, imminuere, *Pharmac. Aug. Reslit. pag. 493. &c.* regressi. Quamvis aliàs & ipse similia magisteria, aliàsve aliquas res, elegantem & expectum colorem suppeditantes, à Balsamorum compositione neutiquam rejiciam; ac ipse probè sciverim, non tam pro Balsamorum virtute augenda, quàm ut oculis blandiantur, à *Zwelferi* magisteria ista fuisse addita. Aliud itaque est disquirere: an talia magisteria pro oculorum oblectamento vel virium incremento addantur? Aliud: an benè vel malè eadem permisceantur?

CAPUT II,

de Emplastro magnetico Angeli Salæ.

P*Ag. 72. de Emplastro magnetico Angeli Salæ Dn Hoffmannus agit, Lectoremque ad Zwelferi animadvers. pag 377. & Pharmac. Augustan. Reslit. pag. 373. amandat, mox addens: Turpe est Doctori, cum culpa redarguit ipsum. Quod epiphonema, cui debetur, cum nonnihil obscurum videri alicui posset, quia tamen in prefato Examine meo Zwelferi antilogiam, sive quòd culpa, qua onerat Augustanos, ipsum quoque redarguat, demonstrare occasio tuerit, quò minùs, scriptum id ipsi fuisse, credam, nihil sanè ob stare videtur. Quod idcirco ut mone-rem, necessarium æstimavi.*

CAPUT III,

de Extracto panchymagogo.

EXtractum panchymagogum Crollij novam disceptandi materiam *pag. 85. & 86. suggerit. In quo justam vocat Zwelferi censuram de speciebus diambrae & diarrhodon. Abbatis (licet, ut obiter hoc addam, ista Zwelferi laudata cen-*

D 2sura

Sura non directè Crollianum, sed Augustanum Extractum panchymagogum respiciat; quæ pluribus à se invicem passibus distare, imprimis verò in Augustanorum Extractum nominatas istas species diarrhodon non recipi, fido oculorum testimonio constat; unde ipse etiam *D. Schröderus pag. 222.* Augustanorum Extractum aliud, quàm Crollianum, esse, non obscure adserit) cum spiritu vini extrahendis; quia negari nequeat: 1. in spiritus vini abstractione magnam fragrantia & essentia aromatica portionem simul abstrahi; 2. spiritum vini speciebus diambra saturatè imbutum, licet aliquid extrahat, tamen adeo aptum ad ulteriorem & pleniorē additarum specierum extractionem non evadere, ut *avolsia* edocet. Verum non omnino justam Zvelferi esse animadversionem, Examen ejus in *Pharmac. August. Restit.* indicat. Videturque ipse *Dn. D. Hoffmannus* à Zvelferi sententia deflectere, adeoque non adeo justam illam esse, tacitè innuere; dum non omnem fragrantiam & essentiam aromaticam, sed magnam tantum portionem cum vini spiritu abstrahi, necum perhibet. Quam tamen non esse Zvelferi mentem, animadversiones ejus in Extractum diacarthami *pag. 132.* & Extractum holagogum *pag. 136.* ad quæ nimirum in reformando Augustani Dispensatorij Extracto panchymagogi Lectorem amandat, clarè satis edocent. Ibi enim fragrantiam & essentiam aromaticam omnino exhalare, hinc subtiliores & penetrantissimas partes avolare, legitur.

2. Vini spiritum à speciebus diambra saturatè imbui, negatur; si namque dosis amborum inspiciatur, libras quinque spiritus vini, uncia unica & dimidia specierum destinari, observatur. Jam quis tam exiguam specierum quantitatem à liberaliter infuso vini spiritu, cujus respectu quadragesima saltem pars existunt, tam saturatè imbui, defendere ausit, ut, secundum Zvelferi judicium, justum *D. Hoffmanno* dictum, ad ulteriorem

riorem extractionem ineptus & inhabilis evadat? Quod infuper si Crolliano Extracto adcommodetur, multò magis injusta animadversio *Zwelferi* vocanda esset, cùm in ejus descriptione spiritus vini quantitas planè non ponatur, sed potius tantum, quantum opus est, sumendum esse, indigetur.

Si verò tanta liquoris copia à tam exigua specierum quantitate saturatè imbutur, proh! quanta ejusdem in Extractorum nonnullorum officinalium præparationem profusio fieri debet? Unicum *Zwelferi* Extractum hydragogum, quo de etiam pag. 127. *Pharmacop. mœe* egi, centum & viginti libras, id est, quadraginta quinq; mensuras nostrates spiritus vini requireret.

Faciliùs aliàs concedo, vini spiritum, virtute specierum diambrae sic imbutum, non ampliùs adeo aptum ad ulteriorem extractionem esse, quàm si purus idem, nec priùs pulveri præfato superinfusus, adhibitus fuisset; ast saturatè imbutum eum esse, nimis liberaliter adstruitur; cùm hac ratione ulteriori extractioni planè esset inhabilis; quod autopsiæ repugnat.

Tandem turbethum gummosum, agaricum, & scammonium præbere resinam, notat *Zwelferus*, quæ nisi exactè à reliquo extracto prius separetur, & vel pulverisata, vel recenti spiritu vini soluta, perfectè inspissato extracto addatur, minùs efficax præbeat medicamentum, duplex incommodum involvens, nimirum quòd in liquoribus totaliter solvi non possit, & nil ferè operetur. Cujus animadversionis vanitatem pag. 127. *Pharmac. Augst. Resit.* prolixè demonstravi. Se tamen in nonnullis opponentem mihi hîc video *Dn. Fridericum Hoffmannum*, videlicet dum resinam in hac præparatione quidem emergere, eam tamen prius pulverisatam, vel in vini spiritu solutam extracto addi debere, non sequi, judicavi, cùm talis resina, absque præcedente ejus separatione, unà cum reliquo extracto non-

resinoso, ad spissitudinem, siue debitam consistentiam evaporato, probè, mediante pistillo, contusa & subacta, optimè ei miscetur, ac talismodi Extractum eundem det effectum, quem præstaret, si vel pulverisata, vel vini spiritu soluta, fuisset addita. Hisce itaque obviam procedit *Dn. Hoffmannus*, & particulas resinosas per contusionem & subactionem cum pistillo ad tempus quidem segregari, brevi tamen temporis spatio ad genium suum redeunt, sui juris fieri, seq̃ue ab extracto reliquo segregare ac separare, utpote aqueæ naturæ, objicit, atque idcirco recto adhuc stare talo *Zwelferi* traditam animadversionem, similes utpote resinas cum amygdalis dulcibus pro partium resinotarum disgregatione priùs esse subigendas, concludit. Verùm monitum illud de resinarum cum amygdalis subactione recto stare talo, nullibi, quantum quidem recordor, nec à me quoque (nisi quod *pag. 117.* sed *Zwelferi* tantum ex fundamentis, licet propterea non concessis, habetur, adeoque propriè huc non spectat,) fuit negatum; hinc *cit. pag. 121.* similes resinas cum amygdalis dulcibus, semine melonum, vel alio aliquo corpore oleoso, ut nucleis pineis &c. pro disgregatione particularum resinotarum, subigere, me non prohibere, monui.

Totum autem objectionis Hoffmannianæ robur in eo consistere videtur, quòd Extracta, & in specie istud panchymagogum, de quo utpote jam agitur, liquidiori consistentiâ gaudere, fortè autemet. Non equidem me diversitas Extractorum, ratione consistentiæ latet, dum eorum aliqua existunt fluida, quæ tamen Essentiæ potiùs nomine veniunt, prout *Celeber. Dn. D. Job Theodor. Schenckius part. special. syntagmat. componendi & præscribendi medicamenta, class. 3. sect. 6. cap. 1.* idem perhibet. Illa verò quæ siccioris sunt substantiæ, κατ' ἐξοχὴν Extracta appellari consueverunt. De fluidis istis *Augustani* in *Classe septima Dispensatorij* sui neutiquam tractant, sed de alterius ordinis Extractis;

tractis; quæ quidem iterum non uno modo se habent, dum vel magis vel minùs condensata reperiuntur. Quo autem substantiæ modo *Augustanorum* Extracta gaudeant, ut hîc præmoneram, necesse est; omnia videlicet, exceptis paucissimis, sicca, quasi & solida, quibus etiam adnumero Extractum nostrum panchymagogum, existunt; reliqua licet humidiora non nihil compareant, propriè tamen fluida dici nequeunt, sed cum v. g. conservarum sicciorum consistentia similitudinem habent. Jam utrum in illis resinæ, reliquo non resinoso extracto per diligentem cum pistillo contusionem & subactionem studiosè unitæ, tam faciliè brevi temporis spatio, imò unquam, si vel per plures annos in Pharmacopolio Extractum remaneret, præcipitari queant, omnibus rem benè pensitantibus judicandum, relinquo. Mihi sanè adhucdum illud non videtur. Nec in reliquis mollioribus Extractis accidere istud posse, si quis experimentum ritè facere velit, faciliè observabit.

Ast posito, sed neutiquam concessio, evenire hoc in Extractis taliter paratis, idem certè *Zwelferianis*, si cum vini spiritu solutæ, vel saltem pulverisatæ resinæ iis fuerint immixtæ, faciliè accideret. Pulverisatæ etenim, cum primis si aër tepidior Extracta circumster, sicquæ resinosas particulas liquet & in fluorem redigat, non minùs fundum essent petituræ; quod periculum nec illæ, spiritu vini solutæ, cum tempore effugerent, avolante scilicet paulatim vinculo illo, quo tenebantur, nempe vini spiritu.

Quòd autem Extractum, absque illa à *Zwelfero* indigitata *ερχεινός* confectum, totaliter in liquoribus solvi non possit, ut *Zwelfero* simpliciter credam, nemo mihi persuadebit. De aquosis equidem liquoribus verè hoc dici, certum est, sed de omnibus idem adfirmare, spiritus ardentes, vini, anisi &c. repugnant. Quamvis, ut & hoc ex *Pharmacopœja Augustana* Re-

stitutata

stututa repetam, eidem animadversioni Extracta quoque, pulverisatam resinam recipientia, sint exposita; accedente enim aqueo liquore, cum primis si tepidus, calidusvè is existat, resinas in fundo præcipitatas invenire licet; id quod pariter cum spiritu vini solutis resinis accidere, gialappæ sic dictum magisterium oppidò evincit.

CAPUT IV,

de Feculis.

P*Agin. 86. & 87.* Feculæ producuntur, quas *Zvelferus* eliminat, quia succo suo nativo totaliter sint orbata. Quod à me *pag. 501. Pharmac. August. Rest.* fuit negatum, cum illa *Zvelferi* adfertio sensibus repugnet; non enim esse eas succo totaliter, uti *pag. 64. append. animadvers.* scribit, orbatas, & hinc nec omnis virtutis & efficacia expertes, quod *pag. 446. animadvers.* objicit, superstes post subsidentiam factam humiditas, cujus igitur intuitu exsiccatio instituenda præcipitur, fidem facit, ipsaque ari Fecula debite præparata acrem nonnihil saporem retinet. Verùm licet aliqua salis acris pars gustu perceptibilis remaneat, omnem tamen non esse superstitem, *Dn. Frider. Hoffmannus* excipit. Quo ipso nihil, quod contra meam sententiam pugnet, adfertur; unde *pag. cit.* Feculas nativo suo succo ex parte orbatas esse, in dubium me haud vocare posse, ingenuè edixi. Ast ob partes aliquas acres ablatas, Feculam ari mox planè rejicere, sanè haud decet; cum & ipse radicum ari à *Zvelfero* commendatus pulvis omnes illas minimè retineat; quare *pag. 404. animadvers.* radicum istarum acrimoniam in ipsa exsiccatione, adimi, fatetur, & *Dn. Frider. Hoffmannus pag. 415.* aquam ex ari radice alexipharmacam contra pestem destillari, perhibet; quas itaque virtuosas particulas in exsiccatione, pro pulvere, confi-

conficiendo, detrimentum quoque pati & exhalare, est credibile.

Imò si *Dn. D. Hoffmanni Methodus medendi* evolvatur, varia inter medicamenta, quæ maximo cum successu ad crassos & glutinosos humores tartareos attenuandos, meatus obstructos referandos, & humorum ebullitionem sedandam exhibentur, ari quoque *Fecula*, nec non *Pulvis cachecticus Quercetani*, qui eandem cum aliis ingredientibus continet, pag. 69.prehendetur.

Bryoniæ insuper radix, dum in *Feculam* abit, succi acris portionem similiter deperdit, & tamen à *Dn. Hoffmanno* ob egregias virtutes, pag. 285. & 286. not. *Schröd* laudatur; prout etiam *pœoniæ Fecula* pag. 286. & 293. commendatur.

Ast subjungit *Hoffmannus*: *quid fiet de cæteris, quæ tantâ succi medicamentosi copiâ non abundant?* Respondeo: benè cum ipsis agatur. Quò minus enim radices aliquæ de illo participant, eò minus quoque periculum amissionis ejusdem, in *Fecularum* expressione &c. ipsis imminet.

Ad confutandum autem *Zvelferum*, adduxi tritici *Feculam*, quod amyllum vulgò vocatur, quam tamen effœtum & omnis virtutis expertem non esse pulverem, imò ab ipso *Zvelfero* medicamenti immisceri, monui; neque scripsisse illa, hætenus me pœnituit. Pro salvando quidem *Zvelfero*, amyllum nihil probare, *Dn. Hoffmannus* infert; ἀραιον enim esse; unde nihil certi de hoc pronunciari de ejus virtute possit. Veruntamen aliud verba *Zvelferi* innuunt, quibus inutile & effœtum medicamenti genus in genere *Feculas* adpellat; cùm igitur amyllum pariter adnumerari *Feculis* debeat, succusque ejus natus diutinâ in aqua maceratione resolutus, tandem, subsidente pulvere farinaceo, effundatur, quin eodem epitheto à *Zvelfero* inscio fuerit condecoratum, partemque non exiguam succi nativi, & consequenter virium, amittat, nullum dubium

superest. Sed cum nihilominus à *Zwelfero* pluribus medicamentis amyllum inferatur, Feculas non ita simpliciter inutile & effectum medicamenti genus fuisse adpellandas, hujus quoque intuitu concludere mihi placuit. Quare nondum video, quòd adductum amyli exemplum nihil probet. Non enim isto omnes salvare propriè & simpliciter volui Feculas, sed tantum contra *Zwelferum* evincere, non omnes censuram istam mereri.

CAPUT V,

de Extracto marocostino.

P*Ag. 101. & 102. Dn. Friderici Hoffmanni cura in vindicandis à meo pag. 103. &c. Pharmac. August. Restit. examine, animadversionibus, Pilulis sive Extracto marocostino Excell. Mindereri à Zwelfero scriptis, versatur. Verum quidquid contra illud excipiat, non omnino inconcussam relinqui Zwelferi censuram, jam jam demonstrabo.*

I. Aquas destillatas, compositioni huic adsignatas, nequicquam, qua corrigendo, qua extrahendo præstare posse amplius, quàm aquam aliquam simplicem aut pluvialem, & spirituosi si quid habent, in Extracti inspissatione penitus evaporare, *Zwelferus animadvers. pag. 137. objicit. Cui pag. 131. Pharmac. August. Rest. contradixi, negando, omne spirituosum in illis contentum evaporare, cum pars aliqua Extracto conjuncta remaneat. Hoc tamen sensibus repugnare, Dn. Hoffmannus objicit, ut ipse fateri cogar, magni momenti haud esse. Verum est, quòd scripserim, magni momenti haud esse exiguum illud, quod ab aquis destillatis Extracto conjunctum remanet, & si de totali Extracti exsiccatione, quæ non simplici evaporatione fieri debet, sed in B. abstractione, quò ita liquor iste pro nova præparatione servari queat, sermo sit, nihil cum eo remanere, jam pariter concedo.*

Mini-

Minimè tamen inconcussum, quidquid *Zwelferus* in hac materia protulit, ideo permanet, nisi & ipsi eadem culpa, *Minderero* hîc imposita, imputetur. Quantum enim cichorij vel endiviæ aqua in rhabarbari & foliorum senæ Extractis *Pharmacop. Reg. pag. 79.* qua corrigendo, qua extrahendo, præstant, ampliùs, quàm aqua aliqua simplex, aut pluvialis? imò eadem in Extractorum inspissatione, si non penitus evaporent, parum tamen cum iis relinquant, est necesse.

II. Dum aquas istas destillatas ad rerum resinotarum extractiones simpliciter inhabiles esse, nego, quia hæ, præter resinam; alias etiam, aqueas, non inutiles, & cum aquis se extrahi permittentes partes continent, denuo à *D. Hoffmanno* impugnor, qui 1. res resinosas, quatenus resinosas, in se nullas habere aqueas partes, sed juxta se habere posse, scribit; 2. quænam partes maximè ad hoc Extractum necessariæ adpetantur, quærit, ac resinosas, exceptis illis, quæ ex aloë, rhabarbaro &c. extrahuntur, non verò aqueas, hîc maximè expeti, respondet, subjungens : *Gummi ammoniacum, Myrrha, agaricus, lignum aloës &c. in totum resinosa sunt, quid igitur aquei ex illis aqua destillata extrahent virtute insigni præditi, per simplicem infusionem in loco calente?* Verùm quod Prius attinet, licet in istiusmodi subtilitatibus exercitatus haud sim, non possum tamen non quærere: utrum *pag. 131. 132. 133. Pharmac. Augustan. Resit.* ubi nimirum de rebus resinosis Extracti hujus agitur, ullibi scripserim, *res resinosas, ut resinosas in se* habere aqueas partes? Mihi quidem nihil de eo constar. Hoc scio, quòd, res illas resinosas continere vel habere, præter resinam, aqueas etiam partes, simpliciter scripserim. Ubi quidem, meo judicio, non inconcinnè dicitur: *agaricum, lignum aloës &c. in se habent & resinosas & aqueas particulas.* Ast si statuatur, resinosas agarici, ligni aloës &c. partes, ut resinosas, ut puras, in se habere aqueas sive non resinosas

fas particulas, tunc fortè majori jure censura illa Hoffmanniana locum inveniret. Ut adeo, si tam adcuratè loquendum sit, resinas inter & res resinosas magna differentia intercedat.

Alterum quod spectat, si resinosas partes, quas inutiles nec ipse unquam pronunciavi, maximè hic expecti, concederem, an *Zvelfero* patrocinium sic paretur, Prudentiores judicent? Mihi id non videtur. *Zvelferus* enim aquas destillatas simplices ad rerum resinosarum extractionem inhabiles simpliciter pronunciat; quod concedi non posse, repero; si res illæ resinosæ, præter resinam, alias etiam, aqueas partes, prout revera tales habent, contineant, quas nimirum aquæ destillatæ in se recipiunt & extrahunt. Aliud itaque est, aquas destillatas, ut inhabiles, planè excludere; aliud, spiritum vini &c. ceu magis habilem & idoneum, illis præferre. In hoc ipse *Zvelferi* sententiæ totus ferè accedo; illud autem an mereatur adplausum, jam dispiciamus. Gummi itaque ammoniacum, myrrha, agaricum & lignum aloës si cum aqua in calore digerantur, &c. partes aliquas in illam deponunt; quæ &, dum aquam alio colore tinctam oculis exhibent, se manifestant, & si eadem exhales, in fundo superstites occurrunt.

Ex quo simul colligitur, præfata simplicia neutiquam *in totum resinosa* esse; quod neque *Zvelferus* de omnibus istis adserere voluit; unde *pag. 126. animadvers.* agaricum *nonnihil resinosum*, non verò *in totum resinosum* esse, scribit; & lignum aloës cum aquis *Pharmac. Reg. pag. 9.* extrahere docet. Ut taceam, quòd res etiam resinosas, aquæ ope, veluti agaricum, mechoacannam albam, turbethum, extrahat; quo de *pag. 131. & 132. Pharmacop. August. Rest.* disserui.

Sed & hic *Zvelferus Hoffmannum* experitur defensorem, dum allegata cathartica non infundi, sed coqui in aqua simplici, scribit, quousq; omnes virtutes extractæ sint; *quis jam*, addens,
est,

Et, qui ignoret differentiam inter infusionem & coctionem? Sed neque hic scopus propositus obtinetur. *Zwelferus* enim in animadversionibus his aquas destillatas simplices, qualescunque, etiam illæ fuerint, ad extractions rerum resinosarum inhabiles proclamat. Jam quis ignorat, coctiones illas *Zwelferianas* nihil aliud esse, quàm extractions; unde etiam extrahere, communiter idem est, ac rei alicujus partem, quæ desideratur, menstrui beneficio elicere?

Instabunt fortè contrariæ parti additi, atque illa *Zwelferi* verba de extractionsibus solùm, mediante infusione factis, exponi debere, mihi regerent. De quo equidem dubitari meritò posset, cum nimis generaliter *Zwelferus* ista protulerit. Quamvis neque hac ratione salvare eum liceat. Evolvantur quæso paginæ, à me ex *Pharmacopœja Regia* citatæ, & videbimus, nihil de resinosa agarici, mechoacannæ albæ, & turberhi substantia, quantumvis diu multumque coquantur, medicamentis istis accedere. Sic pag. 36. in *Sirupo magistrali primo*, pag. 40. in *Sirupo de tribus solutivo*, & pag. 42. in *Infuso purgante* agaricum, aliis ingredientibus junctum, cum aqua fervente, per noctem, biduum, vel triduum maceratur, colatur dein & exprimitur. Jam si agaricum, uti *Dn. D. Hoffmannus* vult, in totum resinosum est, ideoque simplici infusione vel maceratione cum aqua minimè extrahi potest, annon minùs circumspectum se hîc gessisse *Zwelferum*, jure objicitur? Sed urgebit fortè aliquis, remanentes à tali infusione species, & sic etiam agaricum, adfusâ suff. quant. aquæ simplicis, eousque postea coqui, donec tota virtus extracta sit, sicque resinosas agarici particulas in aquam tandem deponi. Ast aliam *Zwelferus* sic incurrit animadversionem, quia, posito quòd nihil de agarico in præcedente infusione aquæ accesserit, frustra eum macerationi, sive priori extractioni adaptatum, & potius cum reliquis speciebus, soli decoctioni

adhibitis, radicibus utpote cichorij, semini nasturtij, urticæ &c. in *Sirupo magistrali primo* jungendum fuisse, sequitur.

Sed audiamus ipsum *Zvelferum* de resinarum coctione, & quæ per hanc intenditur, earundem solutione, pag. 254. *Pharmac. Reg.* sic differentem: in *Aquis nunquam solvuntur: quantumvis diu multumque coquantur, resident nihilominus intacta, peractâ coctura.* Quamvis monitum hoc negligens pag. 36. *Pharmacop. Reg.* mastichen, gummatibus istis resinosis loco antea citato claris verbis adnumeratam, cum aqua simplici in *Sirupo magistrali secundo* decoquat.

Verùm & hæc transeant, ac resinosas dictorum cathartico-
rum particulas omnes ab aqua in productis medicamentis
fuisse extractas, (extrahi autem, vel à reliquo corpore segre-
gari resinam aliquam, haud nego, quæ tamen cum aqua neuti-
quam intimiùs cohæret, sed vel colatæ illi innatat, adeoque in
subsequente clarificatione separatur, vel panno, &c. per quod
colatura instituitur, atque in colo remanentibus speciebus ad-
hæret, unde aquæ non communicatur, sicque neutiquam hîc
quid evincit,) ponatur, nondum tamen animadversionem,
Zvelferus effugit; siquidem medicamenta ista omnia, usque dum
præparatio eorum absolvitur, resinâ denuo orbantur; utpote
quæ, dum illorum aliqua leniter, in diplomate, ad spissitudinem
mellis, extracti liquidioris, exhalare &c. debent, non secus atq;
ipsi accidit, si cum vini spiritu, dein abstrahendo, fuerit extra-
cta, fundum peteret, atque ita duplex in medicamentis istis
incommodum, ut *Zvelferi* animadversionem adplicem, invol-
veret, nimirum quòd nil ferè operentur, partim etiam in li-
quoribus aqueis totaliter solvi nequeant; siquidem resinas
istas à reliquo inspissato &c. decocto vel extracto separare, eam-
que pulverisatam denuo conjungere, aut spiritu vini solutam,
amygdalisve subactam, addere non præcipit.

Quod

Quod myrrham & gummi ammoniacum concernit, ea licet in aceto nonnihil diluantur, ab adfufis tamen aquis iterum præcipitari, & nihil ab illis diffolvi, quod per chartam bibulam tranfeat, *Hoffmannus* obijcit; cum verò me scribentem videat, fi quid præcipitur, partem tantum resinofam id effe, aqueâ, non omnis virtutis experte, per chartam emporeticam tranfeunte, hanc, videlicet aqueam, effe adhuc probandam, regerit; & fi adfit, manere tamen quæftionem, an talis fit virtutis, quæ pro his Pilulis marocoftinis expetitur? Sed 1. nondum à me concessum fuit, superinfusas aquas istas resinam omnem præcipitare, aliud enim cuius experimentum, imprimis in gummi ammoniaco, facile vel cum aqua simplici instituendum, monstrabit.

2. Nec concessi, chartam emporeticam resinofæ illi aceto dilutæ neque præcipitatæ parti omnem per poros suos transitum denegare; transire enim de ea aliquid, ocularis iterum fides demonstrat, præcipuè si solutio illa calida adhuc filtraretur.

3. Partem aqueam in myrrha & gummi ammoniaco ostendere, non est difficile. Solutio quippe talis si, resinofâ substantiâ separatâ, calori ulteriùs committatur, extractum tandem, in fundo remanet; quod quidem in gummi ammoniaco perpaucum est, copiosius verò à myrrha provenit; unde etiam ab ipso *Zveltero*, cujus tamen defensionis hîc insudatur, duplex myrrhæ substantia, resinosa scilicet & mucilaginea, adjudicatur; hinc *Pharmac. Reg. pag. 254.* myrrham nonnihil de mucilaginea substantia participare, tradit; gummata autem mucilaginosa simplici aquâ, vel destillatâ vel aliis liquoribus dissolvi commodè posse, *pag. 129. Pharmac. August. reform.* animadvertit.

4. Maneat per me quæstio: an aqueæ istæ particulæ talis sint virtutis, quæ pro his Pilulis marocoftinis expetitur, usque dum, eam non expeti, solidè demonstretur. Mihi utraque proba-

probatur; hinc nec præparationem, quæ utriusque conservationi debite studet, rejicio.

III. Agaricum trochiscatum, lignum aloës & costum verum succis herbarum & aquis destillatis perfecte extrahi non posse, cum *Zvelfero* *Dn. Hoffmannus* scribit, mihiq; aliquam simplicium istorum partem extrahi, regerenti, Pilulas has *Mindererianas* ab ea suas non mutuari vires, responderet; quod si de omnibus medicamento viribus dicatur, concedo; ast nullas accedere indè vires, pernego.

Cætera, quæ sequuntur, cum ex mea sententia proferantur, transilio, atque ad alia me confero.

CAPUT VI,

de Pilulis tartareis Quercetani.

Circa Pilulas tartareas *Quercetani* pag. 103. 104. eandem mecum fovet sententiam *Dn. Hoffmannus*, in paucis saltem, discrepans, ita ut unicum sit, quod monere debeo; dum scilicet *Zvelferum* rectius suadere, *adnotatione quintâ* judicat, ut, aquæ loco, vinum pro styracis solutione sumatur, cum ab hoc melius dissolvatur. Quam equidem meliorem styracis solutionem ipse pag. 117. *Pharm. August. Rest.* haud negavi; ast major vini spirituoſa substantia in coctione illa cum avolare cogatur, minus commodè vinum substitui, ne frustra profundatur, innuere è *Zvelferi* fundamentis volui, cum eundem effectum aqua saltem simplex quoque largiatur; si ve jam resina styracis cum superſtite à prædicta coctione vini phlegmate diluta permaneat, si ve ab eodem separetur; quia illud phlegma præ aqua simplici nullam hîc prærogativam obtinet.

Sed regerit *Hoffmannus*: licet spirituoſa vini substantia in decoctione avolet, ut styrax separetur, tamen cum reliquis speciebus melius misceri

misceri poterit. Quæ tamen objectioni meæ neutiquam satisfaciunt, ac potius priorem sententiam meam stabiliunt. Videtur enim concedere *D. Hoffmannus*, spirituosam vini substantiam in coctione illa avolare, & hinc styracem iterum à liquore separari ac præcipitari. Sed quomodo styrax ita separata misceri cum reliquis speciebus melius poterit? Styrax namque unà cum superflite vini phlegmate, confecto mediante aquâ simplici è speciebus extracto liquido, vel decocto addi, sicque, una cum adjuncta aloë, exsiccari debet. Jam notum est ex *Zwelfero*, eum non tantum negare, resinas in aqueis liquoribus resolvi, vel ritè sic misceri posse, verum etiam, si virtutem suam exferere debeant, necesse esse, ut extracto inspissato pulverisatæ, vel spiritu vini solutæ, amygdalisve dulcibus subactæ conjungantur; quæ tamen hic à *Zwelfero* minimè observantur; id est, resina styracis phlegmati vini innatans 1. extracto diluto, sive largæ decocti quantitati (minimè inspissatæ) additur; 2. à phlegmate vini non separatur, exsiccatur, ac pulverisatur; 3. in spiritu vini &c. non denuo resolvitur; 4. amygdalis dulcibus &c. non subigitur.

Imò posito, styracem in superflite à vini coctione liquore esse ritè solutam, nec separatam, idem tamen postea, ubi cum aquoso isto prolixo decocto confunditur, accideret, quod in præcedente marocostino Extracto contra *Augustanos* defendente, *Dn. Hoffmanno* cum *Zwelfero* libuit, gummi videlicet ammoniacum & myrrham, licet aceto nonnihil diluta, ab aquis tamen adfufis iterum præcipitari; sic licet resina styracis in vino vel ejus phlegmate nonnihil solveretur vel dilueretur, ab adfuso tamen aquoso decocto iterum præcipitaretur.

Sed in ipsius *Dn. Hoffmanni* decisione adquiesco, quam ex *Zwelfero*, adnotatione sextâ profert, ubi resinam styracis in decoctum migrare non posse, ipse fatetur.

CAPUT VII,

de Scammonio sulphurato.

P*Ag. III* scammonij cum sulphuris fumo correctionem Zvelferianam propugnat *Dn D. Frider. Hoffmannus*, qua lentissimo igne, absque liquefactione, cum sulphure suffumigatur, eoque melius preparari & corrigi traditur, quò diutius suffumigatio illa continuatur. Quam *Zvelferi* censuram minùs firmo stare calo, *pag. 155. Pharmac. Augst. Reslit.* regessi, cùm potius destructionem, quàm correct onem scammonio promittat. Verùm scammonium vocat *Dn. Hoffmannus* succum resinofum, sale scatentem volatili caustico, acri, mordaci ac maligno, à quo tantam habeat acrimoniam, ut intestina erodat, ventriculum laceſſat, imò totam massam sanguineam fermento suo colliquativo corrumpat; hoc autem figi commodius non posse, perhibet, nisi acidis, à quibus fortem illam & acrem colliquativam operandi vim mitescere, certissimum sit, atque ideo quò diutius & plenius sulphuris fumo imprægnatum sit, eò etiam tutius & efficacius in operando pharmacum fore, quidquid ego contradicam. Quæ omnia firmo adeo robore haud pollere, mihi persuadeo.

Namque scammonium licet succus sit resinofus, sale scatet volatili, caustico, sive acri & mordaci, propterea tamen cum acidis figendum esse, minimè sequitur. Quia omnia salia volatilia certo modo sunt caustica, acria & mordacia, atque eapropter cum acidis semper essent figenda; antequam in corpus ingeruntur; quam tamen nec *D. D. Hoffmanni* esse mentem, scilicet quòd volatilia salia ligari semper cum acidis debeant, nullus dubito. Imò volatilis hujus salis per acida ligationem ipse *Zvelferus pag. 38. append. animadvers.* hunc in modum improbat: *acida omnia salsis contraria, illa scilicet salsa in aliud ens trans-*

mutare

mutare solent, acido reciprocè destructo, ut neutrum horum possit, nec acidum nec salsum nativas suas vires amplius exserere possit. Cum verò non minima purgantium, & ita etiam scammonij, virtus in volatili illa parte consistat, quid suffumigatione istâ imperretur, faciliè quivis ex ipsius Zvelferi decisione perspiciet.

An autem idem sal volatile in scammonio unà malignum sit, alij doctiores judicent? Mihi negare hoc, jam non est animus, imprimis cum ipse *Dn. D. Hoffmannus pag. 166.* purgantia, semper aliquid naturæ infensi admistum habere, determinet, & *pag. 75. sui Meth. med.* euphorbium, elaterium &c. qualitate deleteriâ prædita, adferens, *reliqua* pariter purgantia, *quæcunque etiam fuerint, quæ communiter statuunt omni pravâ ac colliquativâ carere qualitate, si accuratius examinentur, vix immunia esse, statuit,* quia aliquid etiam naturæ infensi admistum habeant, quo viribus nostris imponant, idque *Galenij & Ebn Sinæ* consensu illustrat. Et tamen malignæ vel deleteriæ hujus qualitatis abolitio in reliquis non semper tam anxie quæritur; imò non sine virtutis nativæ detrimento obtineri potest. Quare, ut cum *Hoffmanno* rursus loquar, *quemadmodum in Republicâ multa permittuntur mala, ne graviora mala ex nonnullis severe prohibitis excidentur, ita & nos aliis destituti præsidij, iis interea Ratione & Experientia comprobatis licet non sine virium jacturâ, suam sæpe operationem absolvant facile tamen emendabilem, utemur.*

Scammonium verò genuinum (cum adulterino & illegitimo siquidem nihil nobis est negotij,) tantæ esse acrimoniæ, ut intestina erodat, ventriculum laceßat, totamque massam sanguineam fermento suo colliquativo corrumpat, si de legitimo etiam ejus usu dicatur, creberrima salutaris ejusdem exhibitio haud admittit.

Non negatur, fortiora inter cathartica, siue quæ minori in dosi virtutem suam potenter exterunt, esse referendum; ut

adeo in hujus exhibitione facilius possit ab imprudenti error aliquis committi, sed dosis conveniens ritè propinata, reliquis non neglectis à prudenti Medico circumstantiis, innocentiam ejus abunde defendit.

Quò optimè quadrat, quod *Zuelferus pag. 54. & 55. Pharmac. Reg.* de resinarum purgantium, uti scammonij, gialappæ &c. exhibitione tradit, eorundem cum amygdalis dulcibus subactionem præcipiens, cum aliàs ventriculo & intestinis tenacitate resinosa facile adhærere, & eadem acrimoniâ suâ ac venenatâ qualitate lancinare, totum nervosum genus in consensum trahere, ac infinita mala inducere, atque in specie tormina, passiones colicas, immoderatos alvi fluxus, imò lethalem quandoque hypercatharsin causare valeant.

Unde illâ tantopere commendatâ cum acidis fixatione opus haud esse, denuo concludo.

Sulphuris tamen fumo mitescere fortem scammonij operandi vim, concedo; sed quàm benè hoc agatur, *Helmontius tr. Pharmacop. ac Dispens. modern. §. 48.* edocet: *scammoneam, inquit, rebus acidis incoquunt, ut mitigent: sed novit jam medentum vulgus, sic scammoneam castrari, adeo ut si acido sulphuris vaporis exponatur, planè orbetur suâ virtute, tantumq; scammonea decedere, quantum aciditatis hauserit.*

Conferri hîc meretur ingeniosa *Clar. Job. Nicol. Pecblini* sententia, qua purgantium virtutem ab oleosi, volatilis & acris mistione, in *tract. de purgant. medicamentor. facultatib.* eruditè deducit; cumque illud sal acre alcalicæ, sive, ut alij loquuntur, salis naturæ esse, defendat, ejusdem cum acidis fixationem meritò damnat, atque cum *Helmontio* castrationem *cap. 17. & 21.* adpellat.

Si tamen scammonij sal acre spiritu acido ligandum esset, ipsa certè gialappæ &c. resina eandem quoque deposceret correctio.

rectionem, cum & in illa non exigua acrium particularum copia abundet; quas tamen acidis obtundere, neque *Dn. Hoffmannus*, neque *Zvelserus* præcipiunt.

Ut taceam, quòd *Zvelserus* ipse pag. 134. *animadvers.* liquores acidos, quicumque illi sint, res quaslibet, cum minerales, cum vegetabiles, quæ ipsis imbuuntur, pro ratione majoris vel minoris quantitatis additæ, figere & ligare quodammodo, tradat; unde fiat, ut ipsæ nativas ac genuinas virtutes minùs, quàm aliàs, ubi liberæ sunt, nec peregrinis additamentis præpeditæ, exserere possint; ideoque præstare judicat, cathartica in viribus suis & effectibus illis, ad quos à natura destinata sunt, non impedire, vel etiam destruere. Quæ omnia uti scammonium pariter respiciunt: ita eidem quoque adplicare ista, cuius esset perfacile. Adeoque scammonij præparationem à *Zvelsero* datam veræ & genuinæ nomine dignam, juxta ipsius *Zvelseri* latam sententiam, nemo jure æstimare potest.

CAPUT VIII,

de Alcalibus volatilibus.

Cùm *Clar. D. Otto Tackenius* salia volatilia urinosa nomine alcalium proponat, minùs rectè id fieri, *D. D. Frider. Hoffmannus* pag. 115. cum *Zvelsero* existimat, quia insigniter differant à salibus alcalibus non solum volatilitate, sed & præparatione, virtutibus, ac ratione subjectorum, è quibus eliciuntur. Et cum *Pharmac. August. Restit. pag. 524.* tanti momenti controversiam illam, à *Zvelsero* contra *Tackenium* motam non esse, lususque saltem in terminis existere, volatilia nihilominus illa non inconcinnè alcalia dici posse, innuam, eò quòd alcalium, fixorum, per incinerationem productorum naturam, qua acidis contrariantur & cum illis effervescent, imitentur, iterum

fese mihi opponit *Dn. D. Hoffmannus*, & hac ratione etiam corallia, oculos cancri, C. C. ustum, & omnia quæ acidis contrariantur, alcalia fore, objicit; id quod inconueniens esse, concludit. Sed hæc cujus roboris sint, iam dispiciamus.

Prodeat ipse *Zvelserus*, contra quem nimirum tunc in materia illa decertavi, & quem *Hoffmannus* jam in arenam reducit, arque cur volatilibus illis alcali nomen haud competere queat, nos edoceat. Is itaque *pag. 81. apolog. adversus Tacken.* sequentes rationes adducit: quia 1. toto cœlo differant ex sui natura; 2. modo planè contrario fiendi; 3. omnibus proprietatibus suis; 4. ratione regni, accedit 5. quòd nullus alius unquam inventus, qui sales volatiles alcalia adpellaverit. Licet hæc omnia ita se haberent, nondum tamen, volatilibus salibus nullo modo alcali nomen imponi posse, evincunt. Hoc quidem certum est, neque à *D. Tackenio*, à me, aut ab ullo alio unquam fuit negatum, quòd, si primæva significatio alcali spectetur, nomen istud salis tantum ex herba Kali incinerata propriè competat; eodem tamen nomine, sed impropriè, alia etiam vegetabilium salia, ex incineratis hisceeducta, ob similitudinem aliquam, vel, uti *Zvelserus* loqui amat, per quandam analogiam, venire possunt; prout etiam idcirco, licet pariter impropriè, ob nonnullam convenientiam, siue analogicè, volatilibus urinosi nomen alcali, cum additione: volatilis, ad differentiam alcali fixi, imponere licitum est.

Sed prolatas rationes adcuratiùs perlustrare libet: 1. toto cœlo differunt ex sui natura, objicitur. Quod non simpliciter concedo. Alcalia quidem *Zvelseriana* fixa sunt, reliqua autem volatilia. Verum eandem naturam obtinuerunt, scilicet salinam, ideoque ab omnibus salis etymo salutantur.

2. modo fiendi planè contrario. Si plurimorum salium volatilium à *Zvelsero* tradita præparatio v. g. cornu cervini, vi-

pera-

perarum, hirundinum &c. quæ per violentam distillationem, peragitur, attentius exequiatur, contrarius planè fiendi modus in omnibus non agnoscetur. In utroque enim modo rei, è qua salia ista producuntur, combustio requiritur, differentiâ saltem intercedente, quòd volatile per calorem spontè à terrestri corpore segregetur, fixum autem adfusâ aquâ separari depossat.

3. omnibus proprietatibus suis. Ex. gr. sal alcali fixum effervescebat cum acidis, sulphura extrahit, acidum morbosum absorbet, obstructions referat &c. Idem facit alcali volatile. Unde omnibus proprietatibus differre inter se hæc salia, negatur.

4. ratione regni. Qua objectione, sal alcali fixum ex vegetabili regno, volatile autem ex animali desumi, innuere vult *Zwelferus*; siquidem in universum animalia nihil in se fixi concludere, quàm terram emortuam, sterilem & exsuccam pag. 226. *Pharm. Reg. & pag. 216.* vegetabilibus nullum sal volatile inesse, defendit. Sed vegetabilibus non deesse sal volatile, neminem spero ampliùs fore, qui dubitet. Animalibus verò cunctis, sive earum partibus deesse omne sal fixum, multi adhuc sunt, qui constanter pernegant.

5. denique etiam si nullus inventus fuisset alius, qui sal volatile adpellaverit alcali, propterea tamen *Tackenio* aliisvè cur id facere non liceat? Quis ante *Zwelferum* acetum distillatum concentratum adpellavit spiritum Veneris? An ergo eundem ita vocare, *Zwelfero* capropter non fuit integrum? Quamvis *Celeb. Tackenius*, nequiquam primum se esse, probè sciat, qui volatile sal vocaverit alcali. Quasi *Job. Bapt. Helmontius* non idem ausus fuerit, dum v. g. diuretica alcali volatile continere, cap. 5. §. 16. de lithiasi testatur, & tract. Blas humanum §. 53. omnis potio, ait, vulneraria, oculum alcali, & quidem volatile, in se contineat, oportet,

oportet, si accidentibus ex corruptione acoris natis, resistere debeat. *Quatenus alcali quodvis omnem aciditatem, quam attingit, perimit; & tract. de sede animæ ad morbos §. 20. sic repetit: imprimis herbas vulnerarias operari virtute cujusdam innati alcali, aliàs ostendi.*

Cæterum in terminis saltem esse lusum, adhucdum adfero. Quod enim *D. Tackenius*, & alij sal alcali volatile, *Zwelferus* sal volatile falsum nominat. Ut adeo *Tackenius* vera scribat, salia volatilia animalium esse alcalia, non verò falsa, innuens; siquidem ipse salis sub nomine sal neutrum, sive quod ex acido & illi contrario alcali mistum est & enixum, proponit. Nec vicissim à veritate deflectit *Zwelferus*, dum salia animalium volatilia esse falsa, non verò alcalia, urget; cum salis sub vocabulo ipsi veniat, quod *D. Tackenio* alcali audit. Res itaque eodem recidit; modò quid terminis istis indigetur, unà explicetur; ne, refutando alios, innoxium saltem aërem percutiant *Censor*es rigidi; prout toties *Zwelferus* *D. Tackenium* mendacij, contradictionis &c. arguit, si hic salia v. g. neutra nomine falsorum indigat.

Quamvis fateri quilibet debeat, salis nomen primariò sali nostro, communi competere; adeo ut sal simpliciter scriptum si reperiatur, de eodem accipiendum sit; illud autem mediæ naturæ, i. e. ut *Zwelferi* termino utar, acido - falsum esse, non est dubium; nec ipse *Dn. D. Hoffmannus* contrarium perhibet; licet etenim *pag. 333. col. 1.* ex numero salium purè acidorum sal commune esse scribat, *col. tamen. 2.* idem sal commune ex spiritu salis acido, & sale tartari fixo, tanquam alcali fixo, fieri ostendit. Unde, si propriè sit loquendum, sponte jam sequitur, quòd illa salia, quæ ad naturam salis communis, scilicet ut sint ex acido & alcali composita, proximè accedunt, falsa multò rectius essent vocanda, quàm alcalia, quæ longè à salis communis natura abeunt.

Et hoc fundamento jacto, negari eâdem facilitate posset, alcalibus fixis nomen salis convenire, qua volatilia non esse, alcalia dicenda, *Zwelferus* propugnat. Namque 1. sal propriè dictum, sive commune, ab alcalibus fixis differt ex sua natura; cum constet ex acido & alcali, alcali autem tantum ex alcali; 2. modo fiendi; alcalia quippe prægressam corporum, è quibus educuntur, combustionem requirunt, sal verò commune est falsugo aquæ falsæ, marinæ scilicet vel fontanæ, quæ falsugo humiditatis aqueæ evaporatione inspissata remanet, prout hunc in modum ab *Exc. Schrödero pharm. med. chim. lib. 3. cap. 21.* describitur; 3. proprietatibus suis. Alias aliquas virtutes sal commune, alias alcali fixum possidere, extra controversiam est; 4. ratione regni. Sal commune in mineralium catalogo ponitur, alcalia fixa in vegetabili regno natales sortiuntur.

Ex quo jam adparet, salia illa neutra non inconcinnè falsa dici. Præterea si sunt salia, ut *Zwelferi* verba *pag. 82 apolog. contra Tacken.* adplicem, erunt ergo falsa. Nam salia esse, & non falsa esse, implicat; ergo salia enixa sunt verè & ex sui natura, realiter salia, & quidem purè falsa.

Taceo, quòd, salibus volatilibus, ob rationes supra ventilatas, alcali nomen imponere si haud conveniat, plura alia Præparata nomine, quo hætenus in Officinis & alibi nota fuerunt, essent privanda; v. g. *saccharum Saturni, crocus Martis &c.* Non enim ipsis cum saccharo propriè sic dicto, & croci floribus, si naturam eorundem, fiendi modum, proprietates & virtutes &c. consideremus, similitudo intercedit, & tamen à *Zwelfero* & *Hoffmanno* saccharum & crocus adpellantur.

Quod verò *Dn. D. Frider. Hoffmannus* objicit, eâ ratione, si nimirum alcali dicendum sit, quod acidis contrariatur, coralialia etiam, oculos cancri, cornu cervi ustum, & omnia, quæ acidis contrariantur, alcalia fore, nihil contra me evincit. Nam,

quòd corpora illa acidis contrariantur, & cum iis efferveſcant, id propter innatum ipſorum alcali fieri ſi dicerem, neque ipſius *Dn. Hoffmanni* cenſuram incurrere poſſem. Ipſe enim in coraliis, & lapillis cancerorum tale ſal alcali agnoſcit. Idcirco omnem coraliorum virtutem dependere ab eorum occulto alcaliſato, pag. 162. ſtatuit, quo acidum præternaturale in corpore præcipitent; de lapillis itidem cancerorum pag. 191. *meth. med.* *Vi non ſolum vulnerariâ*, inquit, *ac febrisfugâ*, *ſed & diureticâ & lithontripticâ*, *quæ ab innato illorum alkali dependet*, excellunt; & pag. 699. *notar. Schröder.* cum *Helmontio* in iſtis lapidibus alcali agnoſcit; is etenim *tract. Blas human.* §. 53. ob occultum volatile alcali eos diureticos & vulnerarios declarat; ſimilia etiam §. 20. *tract. à ſede animæ ad morbos* exhibet.

Licet, ut & hoc moneam, coralia, oculi cancerorum &c. quamvis acidis contrariantur, propterea non ſtatim ſalia alcalia dicenda eſſe, ſequatur, ſed tantùm corpora ſal alcali in ſe reconditum habentia. Nobis hîc de ſalibus, iisquæ meris ſalibus, non aliquo cum corpore miſtis, ſermo eſt. Unde omnia illa ſalia (non omnia corpora miſta,) quæ acidis contrariantur, ſive illa pura ſint, ſive aliis immerſa & occultata corporibus, ſalia alcalia ſolùm dici debent.

Cùm verò *Zvelſerus* alcali nomen ſalibus animalium volatilibus ideo minimè competere inſuper autumet, quòd, licet acida, tanquam contraria, immutent, eadem tamen non totaliter deſtruant; cùm econtra ſalia lixivialia, ſive alcalia fixa, totaliter deſtruant acida, inque aliud ens ambo degenerent, à quo arte revocabilia nunquam, longè eum falli, judicavi. Nam poſito, ſalia volatilia ab acidis tantummodo immutati, fixa autem alcalia ab iisdem totaliter deſtrui; hoc ſanè nondum evincere, objeci, iſta non dici poſſe alcalia, quia & dicta immutatio, & deſtructio contrarietatem involvunt, & in utraque ſalia
in

in aliud ens degenerant. Verùm instat *Hoffmannus* : *hæc ratio Zvelferi omnino evincit salia volatilia alkalia dici non posse, eò quòd alkalia spiritus acidos destruant & in aliud esse tertium convertant, quòd quasi ipsorum proprium est; volatilia autem licet ab acidis quodammodo immutata, tamen iterum ab his separari possunt. Deinde immutatio & destructio non contraria, sed subordinata sunt. Tertiò quod de spiritu vitrioli affert, quem iterum ex Tartaro vitriolato revocabilem esse probat pag. 521. ambigue mechanica est, ego sæpius frustraneo effectu tentavi, tantis autoritatibus non refragans facile me submittam, donec contrarium crebrioribus laboribus evincam.* Verùm rationes hæc nihil planè evincunt. 1. Namque, spirituum acidorum per alcalia, fixa destructionem esse de nihilo, repeto, cùm ex. gr. tartarus vitriolatus ignis torturâ spiritum vitrioli iterum dimittat; nec urgebo jam, quòd acidi spiritus pariter per alcalia volatilia destrui, *Zvelfero pag. 28. 38. 72. append. animadv.* dicantur. Deinde quamvis alcali fixum & acidum, per factam sui conjunctionem, in aliud tertium, scilicet quod neque alcali, neque acidum simpliciter dici potest, abeant, sciendum tamen est, volatili quoque alcali, cum acido maritato, idem accidere; unde ipse *Zvelferus*, salia animalium urinosa ab acidis in aliud ens transmutari, *pag. 38. cit. append. & pag. 72.* eadem salia volatilia, cuncta fermenta acida & spiritus corrosivos omnes in aliud esse planè commutare, ipsaque etiam in alienam naturam converti; nec non *pag. 28.* spiritum acidum quemcunque, & urinæ urinosum, si conjungantur, in ens alienum transmutari, ac neutram, & à parentibus diversam sobolem progenerari, scribit.

2. Immutationem & destructionem non contraria, sed subordinata esse, in dubium non vocabo. Sed quomodo opinionem suam contra me stabilire ex hoc valeat *Dn. Hoffmannus*, minimè video. Si tamen attentius rem inspicio, verbis meis alienum sensum tribui, existimo. Sic enim adversus *Zvelferum*

infero: *Posito, salia volatilia ab acidis tantum quodammodo immutari, fixa autem alcalia ab iisdem totaliter destrui, hoc tamen nondum evincit, ista alcalia dici non posse, quia & dicta immutatio, & destructio contrarietatem involvunt.* Videlicet dicta salium acidorum, & volatilium urinosorum, ab eorum conjunctione orta, immutatio contrarietatem acida inter & alcalia volatilia involvit; & dicta pariter salium acidorum ab alcalibus fixis, atque fixorum alcalium ab acidis destructio contrarietatem inter illa designat.

3. Spiritus vitrioli è tartaro vitriolato prolestio ambigua utique mechanicæ esse potest, nec illa succedet, si ritè non instituat; ast destillatio ubi benè peragitur, spiritum istum, elargitur. Sic tartarum vitriolatum, cum triplo boli exactè si misceatur, frustraneam non reddere destillantis operam, sed spiritum largiri acidum, iterato, dum hæc scribo, experimento confirmor.

Inconculsum itaque manet, optimo jure alcalia vocari posse, quæ ex animalibus & vegetabilibus artificiosè eliciuntur salia volatilia, acidis opposita. Eoque audaciùs ita concludo, quò certior sum, ipsum *Dn. D. Hoffmannum*, licet pluribus contrariam sententiam prius propugnaverit, tandem dum discursui illi colophonem imponit, magis amicas manus mecum jungere, & alcalica vel alcalizata dici illa posse, consensu suo confirmare. Facilior itaque in hoc ero, & salia ista volatilia, si loqui adcuratiùs velimus, non tam alcalia, quàm alcalica (de alcalizati vocabulo nonnihilo dubitans, quod Criticis excutendum relinquo) concedam, esse dicenda; modò & hoc admittatur, quòd reliqua etiam salia fixa per incinerationem &c. vegetabilium producta, si adcuratè sint denominanda, non tam alcalia, quàm potius alcalica vocari debeant; non enim sunt, revera salia alcalia, sive salia ex herba Kali facta, sed illi ex herba
Kali

Kali elaborato sali, ideoque alcali propriè dicto, similitudine aliquâ saltem accedunt, atque idcirco alcalica existunt.

Licebit interim mihi, cum pace aliorum, ipsiusque *D. Hoffmanni*, salia volatilia dicere alcalia; cum & eandem libertatem ipse sibi integram voluerit; quod uno alterovè exemplo faciliè ex ejus *Methodo medendi*, dum *pag. 179.* in epilepsia, mania &c. ex succo nervorum acido &c. abortis, *medicamina sale alkali volatili referta*, qualia spiritus C. C. sanguinis humani, conducere; *pag. 183.* in nephritide vi absterfivâ, ex *alkali volatili* & acido constantia pharmaca offerenda esse; & *pag. 262.* cruditatem acidam quodammodo volatilem figi & immutari ab *alkalibus volatilibus salsis*, uti spiritu salis ammoniaci falso &c. perhibet, demonstrari potest. Atque in *notis Schröder. pag. 36.* nec non *pag. 668. acidum & alkali* pro duobus salibus fundamentalibus haberi posse, concedit, pro quorum diversa constitutione, dum rarò per se in concretis naturalibus inveniantur, quia aliis mixti particulis sint immersa, etiam productum reciproce istius actionis & mutui concursus variet, ut ex hisce cum aliis Naturæ minimis diverso modo connexis quoad figuras, texturas, magnitudines & indè resultantes diversas motiones, non solum eorum varietas, sed omnes ferè in natura notabiles alterationes originem suam trahant. Sed cum sal alcali fixum, docente illud quoque *Hoffmanno*, actuali demum igne & per combustionem producat, necesse est, ut per præfatum alcali, non fixum, sed volatile intelligat. Ceu pariter de alcali in corpore humano præter naturam redundante, id interpretari decet;

quo de *pag. 262. 277. 319. meth. med.*
agitur.

CAPUT IX,

de Lapidis lazuli preparatione.

DE lapidis lazuli preparatione pag. 438. & 439. *Pharmacop. August.* *Reslit.* egi, quem abluere, supervacaneum esse pag. 181. *Dr Hoffmannus* æstimat, cùm sufficiat, si modò porus nec nimis saxosus obtineatur. Hinc nil absolum veritati *Zwelferum* loqui, subjungit, dum utrumque, & quod eluitur, & quod à lotionem remanet, purum pulverem lapidis lazuli esse, statuit, nullo planè sapore vel per se imbutum, nec etiam aquam eodem imbuentem. Et hoc experientiâ cuilibet manifestatum iri, confirmat, si probare libuerit; falsumque esse, ablutione præparatum non movere vomitum, non lotum autem hoc perficere, cùm tam non lotus, quàm lotus ἀνὰ τὴν καλὴν purget. Verum, si purus fuerit lapis ille, nec impuritates aut alienos succos admistos habeat, quòd nihilominus lavandus sit (quamvis ablutio ista nec adeo laboriosa, nec sumtuosa existat,) haud defendo. Unde nec absorta loqui *Zwelferum*, judico, quatenus de puro lapide agit.

Illud autem, quod in ablutione instituta separatur, partem saltem aliquam pulveris lapidis lazuli esse, negatur; si aqua, ceu ratio suadet, antequam abjiciatur, per aliquod temporis spatium reponatur, quò subtilior pulvis per aquam dispersus fundum petere queat.

Elotum autem pulverem nullo planè sapore esse imbutum, facile credo. Nam licet ante ablutionem saporem notabilem possideret, hic tamen post loturam, utpote per quam auferri debet, in eo utique non ampliùs invenietur.

Aquam etiam saporem aliquem à lapide lazuli non præ se ferre, imprimis si negligentius gustetur, & liberaliter adfusa, sicque particulæ sapidæ, quas aliàs etiam non in ea quantitate admi-

admisceri dicam, qua promptè linguam adficere valeant, disgregata nimiùm fuerint, haud negabo. Ast per evaporationem concentrata linguam sapore alieno feriet.

Utrùm tam lotus, quàm non lotus, ἀνὰ καὶ καθάρ purget, inexpertus haud dijudico. Probabile interea est, magis possè vomitum quandoque excitari à non loto; cum v. gr. salia acida, si ei fuerint permista, æris ramenta, universam lapidis lazuli massam (uti *Celeb. D. Olaus Borrichius tom. 1. Actor. Hafniens. ab Jll. Tb. Bartholino editorum, observ. 68. pag. 129. loquitur*) hinc inde percurstantia, solvere apta nata sint, sicque lapis, vitrioli venerei naturam referentes particulas nactus, ubi non eluitur & dosi liberaliori propinatur, ad vomitum magis irritare valeat.

Pergit dein *Dn. Hoffmannus*: *Adsertio Schröckij Nos etiam frustratur, lixiviosam seu alkalicam Lapidis Lazuli prosapiam gustu judicari, experimento enim factò, ipsum opinione falli deprehendemus.* Ast verba mea si debitè considerabuntur, opinione me falli, tam promptè in posterum non ampliùs objicietur. Neque enim in omni lapide lazuli sal aliquod reperiri, certò venditavi; sed in aliquibus dari, ut scriberem, experimentum sollicitè à me institutum, non nuda opinio, incitavit. Licet non lixiviosam seu alkalicam lapidis lazuli prosapiam gustu me judicasse, sed lixiviosæ ferè prosapiæ esse sal istud, gustum judicasse, scripserim. Ego quidem de fida *D. Hoffmanni* relatione & ritè instituto experimento non dubitabo, sic ut nullum sal in lapide lazuli, quem præ manibus habuit, dicto modo invenisse ipsum, concedere velim; ab uno tamen alteroque lapide lazuli mox ad omnes argumentari, minime convenit,

CAPUT X,

de Auri crudi usu medico.

Nondum hic priorem meam sententiam deferere possum; & quanquam nec auro foliato, nec scobi aureæ magnam in medicina utilitatem adscribere velim, rationes tamen, ob quas *Zwelferus* auri folia rejicit, parum roboris continere, ideoque justè fuisse impugnatas, neque hæcenus sufficienter defensas, scribere non vereor. Easdem itaque repetere, & quo modo à *Dn. Hoffmanno* pag. 200. 201. vindicentur, perpendere libet.

I. *Zwelferus Pharmacop. Reg. pag. 251.* aurum à debili nostro calore & fermento ventriculi insito actuari non posse, defendit. Hoc tamen non considerato, pag. 317. *Mantiss. spagy. Pulverem Excell. Archiatri D. Antonij de Pozis*, qui & scobem & folia auri recipit, magno extollit præconio, inque illo aurum, Solis instar, spiritus nostros irradiare, concentrare, allicere ac à malignis vindicare & tueri, perhibet. Jam in Pulvere hoc, quem aliàs suo in pretio relinquo, eximiasque virtutes à reliquis ingredientibus possidere non diffiteor, hæc auri elogia aut vera sunt, aut fallunt. Si hoc dicatur, omnis ille discursus jam sponte corrui. Sin illud; cur aurum in folia diductum spiritus itidem irradiare &c. non valeat? Namque aurum foliatum est aurum, quoad naturam aut substantiam suam nullo modo immutatum.

II. Aurum foliatum multò solidioris & compactioris substantiæ esse, cit. *Mantiss. pag. 316.* scribit, quàm ut à calido nostro resolvi, & in actum deduci queat; aliud tamen de auri scobe, intelligendum esse, judicat, cum substantia ejusdem à stomachi fermento acido subigatur, actuetur, sicque vires præstantissimas exferat. Verùm si aurum tam solidæ & compactæ substantiæ

stantiæ est, ut à calido nostro resolvi inque actum deduci nequeat, idem sanè etiam de auri scobe prædicandum erit; imò multò magis de ipsa, quàm de auri foliis, quæ tam solida & compacta haud existunt, sed in subtilius corpus artificis manu diducta.

Animadverti etiam in *Censura mea*, quòd *Zwelferus* de auro foliato agens, solum ventriculi calorem, qui utique nullam in aurum foliatum potestatem habet, nominet; de scobe verò differens, fermenti ventriculi mentionem faciat, cui sanè majorem in aurum agendi vim inesse, lubentiùs conceditur; vid. *Pharmac. August. Restit. pag. 153.* Hic insurgit *D. Hoffmannus*, & omnino adeo subtilis esse substantiæ folia auri, objicit, ut calor fermentalis ventriculi nostri in ea agere nequeat, cùm notum sit, in omni actione justam non solum dispositionem agentis ad patiens, & patientis ad agens, sed etiam moram requiri, ut agens in patiens suam exserere actionem possit; folia insuper auri ob tenuitatem, volubilitatem & subtilitatem quasi inporosam ita esse disposita, ut sal ventriculi fermentale seu spiritus fermentalis in ea sese insinuare nequeat; continuum etiam & negotiosissimum chyli motum, quibus folia auri quasi immersa sunt, impedire, quò minùs actionem ventriculi fermentalem sustinere queant; scobem auri econtra à stomachi fermento faciliè subigi. Verùm 1. Dispositio auri foliati ad ventriculi fermentum ritè se habet; quò enim subtilius auri corpus est, tantò faciliùs quoque fermentum ventriculi illud adgreditur; quo intuitu *Zwelferus* ad *Croci auri Mantiss. spagy. pag. 319.* præparationem, nec non amalgamationem *pag. 320.* aurum subtiliter laminatum &c. utpote faciliùs resolvi aptum, quàm si in compactiori massa foret, commendare, verisimile est.

2. Moram requiri, ut agens in patiens suam exserere actionem possit, non in dubium vocabo; sed quòd aurum foliatum

H

non

non aliquandiu in ventriculo moram trahat, antequam ad intestina amandetur, qui contrariam fovēt sententiam, probare debent. Juxta *Zvelferi* mentem diu satis ibidem illud subsistere, statuendum est; cū tunicis ventriculi se insinuare, ac eundem ad nauseam & ἀπεψίαν concitare, autumet. Et licet per breve saltem temporis spatium in ventriculo hæreret, acidum tamen hujus fermentum (suppono enim, ex *D. Hoffmanni* ac *Zvelferi* sententia, quò aliquam in aurum agendi illud habeat potentiam,) interea non otiosum erit, sed si non omnes auri particulas, aliquas saltem in actum deducet; & imprimis ob exiguam, qua communiter in usum venire solent, dosin tantò promptiùs in cunctas potestatem suam exserere possit.

3. Quòd sal ventriculi fermentale in folia auri se insinuare non possit, ob eorum tenuitatem, volubilitatem & subtilitatem quasi inporosam, me fateor non intelligere, quomodo scilicet id contingat; qui scio, iisdem menstruum aliquod solvens adfusus, si non citiùs, certè non tardiùs, quàm scobi aureæ, se insinuare.

4. Continuum chyli motum impedire, quò minùs actionem ventriculi fermentalem sustinere queant folia, eidem autem impedimento scobem, in pulverem subtilissimum redactam, haud esse obnoxiam, ut credam, nondum induci possum. Non jam urgebo, quòd folia auri, aliis medicamentis juncta, jejuno ut plurimum ventriculo offerantur, sicque motus chyli, cū nullus ibidem præsens sit, remoram ullam haud possit creare, atque ita, si non semper, saltem aliquando folia auri fermento ventriculi obedire queant. Nec urgebo, quòd nulla adsit causa, ob quam scobem auri subtilissimum in pollinem, redactam huic pariter incommodo expositam esse, non sit dicendum. Sed tantum, chyli motum neutiquam impedimento esse posse, quò minùs ventriculi fermentum, quod ritè se habere præsup-

præsupponitur, folia auri invadat, sive jam illud fundo lateribusvé stomachi infixum quasi & impactum fingatur, sive per totam chyli, vel potius adsumtorum jam chylosin sustinentium ciborum molem diffusum esse, statuatur; qua enim facilitate in cibos vim suam exserit, eâdem quoque auri foliola attinget; cùm tam horum, quàm illius continuus motus existat. Licet, ut id repetam, si vera essent, quæ *Zvelserus* de foliolorum istorum in tunicas ventriculi insinuatione habet; negotiosissimo isti chyli motui, ut scilicet eundem experiri unâ debeant, exposita illa esse minimè possent.

III. Utrùm auri folia, aliis medicamentis juncta, ad nihil apta sint, nisi ut se tunicis ventriculi insinuent, ac eundem ad nauseam & ἀπεψίαν concitent, experientiam judicem eligo, quæ à talium symptomatum gravitate illa, dum ex. gr. in *Confectione alchermes*, *Pulvere Marchionis*, *Pannonico rubeo primo* &c. exhibentur, quotidie quasi vindicat. Ne dicam, quòd & hac ratione mirè commendatus *Domini de Pozis Pulvis*, nec non *Confectio alchermes Zvelseriana* nauseam & ἀπεψίαν inducere deberent; cùm utrumq; medicamentum auri quoque folia in compositionem suam admittat, sicque *Zvelserus* sciens volensque ægrotos odiosis istis symptomatibus gravaret. An verò auri folia *tunicis ventriculi se insinuare* benè dicantur, *Anatomici* videant.

IV. Folia auri tandem cruda iterum segregari, *Zvelserus* statuit. Mihi verò nullum contra eorum utilitatem argumentum desumi exinde posse, regerere placuit; si magnetismo quodam & irradiatione, uti vult *Zvelserus*, aurum vires suas in corpore humano exserat. Qua in decisione nec *Dn. Hoffmannus* dissentire videtur, dum scribit: *Nec obstat, Aurum nimis compactum ac durum esse, ut à calore nostro digestivo vinci & in actum deduci nequeat, sed integrum per album iterum excerni.* Nam *Auri actiones*

occulta sunt & magnetica, qua in integris sese exerunt. Quanquam cum proximè præcedentibus quomodo hoc conveniat, nesciam, dum scobem auri à stomachi fermento faciliè subigi, traditur.

V. Parvam admodum foliolorum auri molem & vix foliolum dimidium, unam pulverum medicatorum dosin in *Pharmacopæja Augustana* ingredi, cùm econtra scobis auri scrupulus dimidius vel integer pro dosi una propinetur, etiam infirmo insistit pede. Nam parva licet foliolorum auri quantitas unam Pulveris medicati dosin accedat, sufficit, si hæc scintillis aliquibus aureis indè exornetur; folia namque auri medicamento, potius ad gratiam ipsi conciliandam, *Augustani*, id quod in *notis ad Auream Alexandrinam* innuere volunt, adjungunt. Verùm foliolum vix dimidium in una dosi conspici, posset in dubium vocari; quia quamlibet Pulveris Marchionis seu epileptici, ut exempli loco is inserviat, drachmam, ad quam usque ascendere ingredientia ejus permittunt, non vix dimidium, sed ferè integrum foliolum auri exornat. An verò laudatus ille *D. Hoffmanno* & *Zvelfero Pulvis Viennensis* integrum, vel saltem dimidium auri scrupulum, pro summa dosi, recipiat, pag. 154. *Pharmacop. August. Restit.* monstravi. *Zvelferi Pulveris bezoardici secundi solaris & cordialis*, pag. 98. *Pharmacop. Reg. descripti*, singulas doses non integra tria grana Croci solaris intrant, quibus ipsis non multum inesse auri, ac magna ex parte terræ aluminis, ab oleo tartari præcipitatæ, pondus suum illa debere, si dicti Croci præparatio examinetur, deprehenditur. Sed hac vice satis de auro.

CAPUT XI, *de Essentia Martis.*

Discursum *Zvelferi*, quem pag. 437. *animadvert.* de Martis Essentia instituit, illarum in examine pag. 484. &c. discussi;
contra

contra quod antagonistam in nonnullis se præbet *Dn. D. Hoffmannus*, imprimis dum I. Essentias illas ut plurimum liquidas esse, considerans, minùs rectè in vitriolum redactum ferrum à *Zvelfero* eas adpellari, *pag. 485.* objeci, antequam scilicet parte liquidâ separata, in solidam abierint consistentiam, cum vitriolum corpus obtineat solidum. Etenim non video, inquit, præfatus *D. Hoffmannus pag. 233.* quid obstat, quo minus rectè *Cl. Zvelferus* scripserit, essentias illas martiales cum liquoribus acidis confectas nihil aliud, quàm ferrum solutum, vel in vitriolum redactum esse. Priùs enim sumit generaliter & latè, alterum specialiter & stricte &c. Ideoq; cum scribit, vel in Vitriolum redactum esse, intelligit synecdochicè contentum pro continente, nimirum Vitriolum, quod in istâ solutione continetur. Quæ omnia ita sese habere, jam ponamus. Quòd tamen de vitriolo illa monuerim, non nisi *Zvelferi* in gratiam, & redhostimentum factum fuit, utpote qui aliàs propriè rem denominandam esse, urget. Non repetam, quas de aloës locura, de Balsamo loimico &c. speculationes produxerit, sed Spiritum saltem absinthij sisto, quo de *animadvers. pag. 424.* contra Augustanos animadvertit, eum tum vini spiritui, tum absinthio ortum debere, & idcirco non Spiritum absinthij, sed Spiritum vini absinthiten dicendum esse. *Augustani* quidem constitutiva spiritus illius probè sciverunt, similiter tamen synecdochicè loqui voluerunt, partem ponentes pro toto. Plura vid. *pag. 460. Pharmac. August. Resit.*

Optimè etiam huc quadrat sic dictum Oleum tartari p. d. quod dum *Clar. Tackenius cap. 7. Hipp. chim.* alcali tartari fixum adpellat, *Zvelferus* ipsum in *apolog. pag. 56.* hunc in modum invadit: *Quis non videt, quam sit impropria hæc locutio? Nam primò: Oleum Tartari spontè resolutum non est adhuc alcali Tartari fixum. Debet enim priùs ab humiditate sua elementari, per evaporationem, liberari, donec reducatur in alcali fixum, hoc est, in siccum salem Tartari.*

*Nam elementaris humiditas, quæ à sale tartari evaporat, & potior pars
hujus liquoris est non est fixa, sed sal, seu alcali, illi inhaerens. Ex qui-
bus talis de solutione vitrioli, quam Zvelserus vitriolum vocat,
sententia ferri posset: Quis non videt, quàm sic impropria hæc
locutio? Nam solutio vitrioli non est adhuc vitriolum. Debet
enim priùs ab humiditate sua elementari, sive adjuncto liquo-
re, per evaporationem liberari, donec reducatur in vitriolum,
hoc est, in siccum corpus. Nam elementaris vel alia humidi-
tas, quæ à vitriolo evaporat, & potior pars illius solutionis est,
non est vitriolum, vel corpus siccum, sed sal metallicum, seu
vitriolum illi inhaerens. Hinc concludo, Zvelserum aut minùs
rectè solutionem vitrioli adpellasse vitriolum, aut minùs rectè
ob nomen Spiritus absinthij Augustanos reformare tentasse, &
circa sal fixum tartari Tackenum refutasse.*

II. *Vitriolum Martis ritè præparatum haud indignè Essen-
tiarum martialium vices supplere posse, Zvelsero simpliciter
concedere nolui, ipsis Zvelseri verbis pro fundamento positis;
dum Essentias illas sive ferri solutiones in effectu &c. quodam-
modo inter se differre, adserit. Ubi denuo patronum animad-
versionis illius agere præsumit Dn. Hoffmannus, scribens: Nihil-
ominus tamen licet hoc (vitriolum) quarundam Essentiarum Martia-
lium vices haud indignè supplere statuatur, tamen non excludit & reliquas
diversis menstruis elaboratas unde addit, horum ratione magis vel minus
efficaces, magisq; aut minus aperientes, vel adstringentes esse, nec non
volatiliores alias, alias fixiores. Verùm i. Zvelserus non quarundam
Essentiarum martialium vices à vitriolo posse suppleri, statuit,
sed de omnibus Essentiis & Tincturis martialibus, cum acidis li-
quoribus confectis, id eloquitur; & sic vitriolum istud vices
omnium harum Essentiarum supplere posse, consensum meum
recusavi; quibusdam autem subrogari illud posse, nunquam con-
tradixi.*

2. Minimè negavi, *Zvelferum* reliquas diversis menstruis elaboratas Essentias non excludere, cùm addat, horum ratione, magis vel minùs efficaces, volatiliores aut fixiores esse; sed tantùm negavi, quòd *Vitriolum Martis*, si ratione effectus, virtutis aperientis, adstringentisquæ, volatilitatis & fixitatis, quæ utique attentionem in curatione merentur, Essentiæ martiales inter se differant, cunctis hisce succedere, omnemquæ scopum attingere nequeat. Præterea scio, diversissima esse: Essentias Martis excludere; & dicere, quòd *Vitriolum Martis* ipsis subrogari possit.

CAPUT XII,

de Mercurio sublimato.

Cùm *Augustani* pro Mercurij sublimatione vitriolum calcinatum unà cum aliis rebus adhibeant, *Zvelferus* ita esse, illud calcinandum, animadvertit, ne suo corrosivo acido spiritu privetur. Idem verò, tacente etiam *Zvelfero*, *Augustanos* probè cognitum habuisse, pag. 543. *Pharmacop. Augustan. Restit. regessi.* Causam moniti illius pag 159. *apolog. adversus Tacken.* *Zvelferus* consignat, scilicet ne colcothar citius salis spiritus absorbeat, antequam mercurium attingant, unde hic pro majori parte vivus tantùm in sublimatione postea adscenderet. Sed posito, rem ita se habere, spiritus salis tamen, à colcothare absorptos, in illo non figi, sed, igne puta impulsore, cum mercurio & reliquis non absorptis salinis particulis, elevari, respondi; miratus interim, *Zvelferum* ipsam *Mantiss. spagyr. pag. 351.* pro altero Sublimato corrosivo conficiendo capitis mortui vitrioli parum addere; siquidem istud parum aliquid etiam, spiritus acidi absorbeat, nec, quantum propriè parum illud esse debeat, sollicitus aliàs Reformatior determinet. Verùm hic *Dn. Frider. Hoffmannus*, iusto adhuc stare talo *Zvelferi* censuram,

pag. 273. declarat; cùm 1. ejus verba directa sint ad moderatam, & non totalem, ubi penitus penitusque suo corrosivo, acido spiritu vitriolum privatur, calcinationem; in moderata enim partem spirituum salis non ita figi, ut non cum mercurio & reliquis vitrioli acidis particulis elevari possit, in perfecta autem spiritus salis acidus absorberi & coagulari, antequam mercurium attingant, ut mercurius vivus in sublimatione absque salibus adscendere cogatur. 2. Licet ipse parum capitis mortui vitrioli addat, particulas tamen salinas acidas ibidem superare parum illud colcotharis, ut ita facile cum mercurio sublimari queant. Ast nondum sufficienter sic vindicatus est *Zwelferus*.

1. Frustra vitrioli inter totalem & moderatam calcinationem, differentia inculcatur; de hac enim *Zwelferum* loqui, nemo unquam negavit. Hoc quidem opposui, quòd spiritus salis à colcothare (videlicet si illud ad sublimationem adhiberetur,) absorpti, in eo non ita figerentur, ut non cum mercurio & reliquis particulis acidis iterum elevari possit. Idq; adhuc urgeo. Si enim spirituum acidorum tanta cum colcothare esset unio, ut à fortiori calore, qualis in hac sublimatione requiritur, non denuo separarentur, quomodo aliàs è vitriolo spiritus elici posset? Nec major salis spiritui in vitrioli mortuum caput, quàm in mercurium est imperus; tam promptè enim mercurium attinget, atque colcothar invadere potis est.

2. Si parum illud colcotharis à salis spiritus parte aliqua saturatur, & quidem antequam mercurius à reliqua ejus parte attingitur, quem usum singularem colcothar præstet, non video, nisi frustraneam & colcotharis, & particulæ spiritus salis deperditionem. Colcothar etiam, sic acido salis spiritu saturatum, si quid præstaret, annon curiositatis nimix, quam aliàs in *Augustanis* perstringit, reus evadit *Zwelferus*, dum & vitriolum extremè calcinatum, sive acido spiritu privatum, mox tamen denuo

denuo saturandum, & insuper moderatè calcinatum, sive acido spiritu prægnaus, huic processui adcommodat; nam præter colcothar, vitriolum etiam ad flavedinem calcinatum in illo ponitur?

Salinas quidem acidas particulas superare parum illud capitis mortui vitrioli, extra controversiam est; sed quæritur jam: annon & illæ ipsæ acidæ particulæ à dicto capite mortuo absumptæ, ad mercurium solvendum ac sufficienter saturandum, requirantur? Requiritur autem illas, dicendum est, si prior mercurium sublimandi modus Zvelferianus sit genuinus, in quo nimirum, præterquam quod mercurij libræ duæ in aqua forti solutæ addantur, vitrioli ad flavedinem calcinati, & salis communis ana libræ duæ, nitri libra una ponuntur. Præsenti autem secundo modo similiter libris duabus mercurij, corrosivo aliquo sale nondum soluti, præter vitrioli ad flavedinem calcinati libras duas, & nitri libram unam, salis tantum libra una accedit. Unde vel in priore quantitatem salis nimiam, vel in altero processu eandem justò parciozem esse positam, conjicio. Quanquam si Zvelferi animadversio, *Augustanis* scripta, ritè se habeat, potius hoc dicendum veniat.

In *Dispensatorio* enim *Augustano* mercurij, vitrioli calcinati (intelligitur: moderatè calcinati) & salis communis ana libra una pro conficiendo Mercurio sublimato adhibetur. Et tamen Zvelferus in Eos sic animadvertit: *Quantitas præscripta Vitrioli & Salis non sufficit, præsertim si corrosivus (uti ex seq. dulci subl. apparet) reddi debeat Mercurius; necessum igitur est, ut non solum pondus eorum dupletur, sed & sublimatio Mercurij, additis semper recentibus speciebus, Sale scilicet & Vitriolo, bis ter vé reiteretur.* Jam si Zvelferi dicta descriptio cum hac animadversione conferatur, non duplam salis, sed in duabus instituendis sublimationibus anaticam saltem ejus proportionem mercurio adponi, observatur; quare salium

horum quantitas non sufficeret, cum tamen corrosivus (uti ex contextu adparet,) reddi debeat. Si ergo non sufficiunt mercurio, quomodo de illis tantum ad colcothar saturandum superabundabit?

Pergit dein *Dn. Hoffmannus*, scribens: *ut sublimatus mercurius commodè in crystallinam elevetur compagem, necessum est, ut non solum pondus vitrioli & salis dupletur, sed sublimatio sæpius reiteretur, quo sublimatum aquè benè corrosivum fiat, id quod &c. Schröckio concedimus; at minus hac corrosione, que malignam ac deleteriam secum trahit qualitatem, quam si quis in sublimato ex nitro vel aqua forti confecto negare auit, omni rationi & experientiæ repugnabit.* Quid hic concedat *Dn. Hoffmannus*, obscurum mihi videtur, qui constructionem horum verborum penetrare nequeo, ut adeo errorem aliquem in typis locandis fuisse commissum, suspicer. Cæterum primò *Zwelferus* vitrioli & salis augmentum deposcit, si mercurius corrosivus reddi debeat; ubi quidem majorem corporum dictorum quantitatem commisceri posse, impugnare nolui, sed cum iis in illa ab *Augustanis* præscripta dosi, mercurium non reddi corrosivum, ita ut à copiosiori demum addito vitriolo & sale evadere debeat corrosivus, negavi, & adhuc pernego.

Dein mercurio, cum nitro vel aqua forti confecto, malignam ac deleteriam qualitatem adsignare videtur, ita ut qui negare eam auit, omni rationi & experientiæ repugnet. Unde magis ad medicinam adaptari sublimatum judicat, qui solum cum vitriolo & sale absque additione nitri vel aquæ fortis paratus fuit; & licet ille quoque sit corrosivus, absque malignitate tamen cum esse & noxa, cum per se externè ulceribus sordidis venereis aliisque adfectibus adplicatus, tum etiam ad interna medicamenta, prius dulcificatus, ad usum tractus, sine sanitatis dispendio aut læsione agat, minoremque periculo usui medico

medicō esse possit, quàm simplex dictus ex nitro & aqua fortī, qui Venetiis in magna copia paratus ad Nos transfertur. Sed hæc omnia nihil probant. Similia ferè declamantem *Zwelferum* in *Pharmacop. Auguſt. Reſtit. pag. 544. & 545.* refutavi. Jam *Dn. Hoffmanno* ut pariter ſatisfaciam, mercurio cum nitro vel aqua forti ſublimato vim ineſſe deleteriam, ſi minùs cautè in uſu ejus procedatur, neminem inſicias ire reſpondeo; ſed alterum abſque nitri vel aquæ fortis acceſſione elaboratum non æquè eſſe deleterium, equidem rationes adhuc, juxta cum experientia, deſunt; ut adeo unum præ altero, hoc reſpectu, curioſè eligere, haud ſit opus. Malignitatem tamen ſingularem illi, non verò huic ineſſe, dubito. Certè ſi unus, alter etiam, abſque malignitate haud erit. Aut quænam alia ſymptomata ſiniſtrum mercurij, cum nitro vel aqua forti ſublimati, uſum ſequantur, quæ non item à reliquo adſumto proſurgant, edoceri cupio.

Fundamentum ſanè, quo iſta contraria opinio de mercurij illius malignitate nititur, labile admodum eſt. Namque vitrioli & nitri ſpiritus per ſe deſtillatos eſſe quidem ſalutares, ſed invicem permixtos, uti in aqua forti fit, inſalubres ac deleterios evadere, ſtatuitur. Sed unde metamorphoſis hæc ſcitur? quænam cauſa mirabilis hujus mutationis? Altum ubique de hiſce eſt ſilentium; nec experientia quidquam hætenus in confirmationem teſtata fuit. Non deſunt quidem exempla, gravium ſymptomatum, ipſiusque mortis, hauſtam improvidè aquam fortem inſequentium, prout *Job. Schenckius lib. 7. obſerv. medic. Daniel Sennert. lib. 6. Medic. pract. Phil. Höchſetterus noſter decad. 3. caſ. 3. & Petr. Borellus hiſtor. & obſervat. medic. cent. 4. obſ. 28.* ſimilia recensent; aſt incauto potui aquæ fortis illa ſucceſſiſſe, atque à forti corrodendi aquæ ſtygiæ virtute ortum traxiſſe, partim etiam remediis corroſionem illam avertentibus fuiſſe,

profligata, ipsæ historiæ loquuntur. Qua ratione nec alij corrosivi liquores, & ipsi vitrioli ac nitri salutare alia spiritus innocui sunt, sed eadem symptomata concitare, vitæque filum, abrumpere possunt. Periculosum acidi liquoris vitrioli usum *Nicol. Tulpus observat. lib. 3. cap. 43.* imò lethalem *Excell. Dn. Thom. Bartholinus cent. 5. histor. 53.* memorant.

Spiritus nitri salutarem usum *Zwelferus & Dn. Hoffmannus* agnoscunt; & tamen aqua fortis, ex vitriolo & nitro destillata, nil nisi spiritus nitri est, cum quo sensuum fide exactè convenit. Unde etiam *Clar. D. Tackenius cap. 7. Hippocr. chim.* spiritum vitrioli in aquæ fortis destillatione non ascendere statuit, & *Excell. D. D. Job. Joach. Beccerus lib. 1. Phys. subterr. sect. 5 cap. 2. pag. 397.* spiritum nitri & aquam fortem parum inter se discrepare, adferit, subjungens *pag. 398. cum spiritus nitri destillatur, si nitrum purum sit, ex libra nitri libram spiritus accipies, nullo capite mortuo relicto, quod in aquæ fortis præparatione quoque contingit, ubi tantum aquæ fortis accipies, quantum nitri addidisti, nec de vitriolo quicquid amittes.* Imò licet spiritus vitrioli, junctus nitri spiritui, malignus, insalubris ac deleterius evaderet; idem tamen in mercurij sublimatione non contingeret, cum ille de nitrosa substantia nil participet, prout *Excell. D. Dan. Ludovici in Pharmac. moderno seculo applic.* determinat, ipseque *Zwelferus* tacitè innuit, dum in secunda Mercurij sublimati præparatione species cucurbitæ lutatæ, suo capitello munitæ, immittere, atque vitreum vas recipiens adaptare jubet, *ad excipiendam humiditatem, seu aquam fortem, inter initia destillantem.*

Possè aliàs mercurium absque nitro sublimatum externè & internè, absque sanitatis dispendio aut læsione adhiberi, certum est, sed minori cum periculo eum agere, quàm alterum, cum nitro vel aquâ forti factum, ob supra dictas rationes campus dubitandi patet amplissimus. Imò internum quod spectat
usum,

usum, Mercurium dulcem è Mercurio sublimato, Venetiis al-
lato, nec sine nitro elaborato, dextrè paratum, esse innocuum,
plures qui usui talem adaptarunt (& sæpius hoc factum, scio,) fatebuntur. Neque externo pro usu eum esse repudiandum,
ad ulcera præsertim venerea, sordida, crustosa, aliosque adfec-
tus, maximam eum præstare operam; suasque mereri laudes,
ipse *Zvelserus Mantiss. spagy. pag. 352.* fatetur; Quamquam non
tam per se, quàm potius aquis mundificantibus, liquoribus
aloëticis, unguentis, emplastris &c. junctus adhibeatur. Plura
possunt *Pharmacop. August. Restit. pag. 545.* videri.

CAPUT XIII,

de Antimonio diaphoretico.

QUæ *pag. 539. & seqq. Pharmac. August. Restit.* de Antimonio
diaphoretico disserui, impugnare *Dn. Frider. Hoffmannus*
pag. 302. &c. adgreditur, cujus nunc argumenta singula-
tim expendere, ordo deposcit.

I. *Zvelserum* in ejus dextra, uti *pag. 460. animadvers.* voca-
tur, præparatione utilissimum nitri & tartari spiritum per de-
tonationem aperto in vase institutam abigere in auras, objeci,
cùm tamen ille, retortæ tubulatæ ope, retrahi à fuga posset,
Verùm quis oleam & operam, sic *Dn. Hoffmannus* in hanc animad-
versionem meam commentatur, perdere vellet, in elaborando chys-
so ex tam exigui ponderis antimonij ℥j. nitri ℥ss, & tartari ℥iij? Si
quis tamen aliàs ex residuo hujus chysii notabilis ponderis ingredientium
antimonium diaphoreticum conficere voluerit, ei integrum erit. Ubi
imprimis notari velim, me non tam aliis, similiter aperto in
vase antimonium sic calcinantium, quàm potius soli *Zvelsero*
cenfuram istam dedicasse; ut scilicet admonitionem ipsius de
aluminis ustione dextrè, ne spiritus ejus acidus frustra in auras

abeat, in alembico nempe terreo vitreato, peragenda ulterius prosequeretur. Cæterum species huic negotio deputatas, in retorta tubulata detonare, esse oleum & operam perdere, mihi persuadere nequeo. Elevari enim spiritus aliquos, (de sulphure antimonij, quod unâ sublimatur, nil dicam,) uti extra dubium est: ita, dum prodierunt, oleum & operam esse perditam, dici nequit, imprimis cum, detonatio, in aperto vase instituta, licet nonnihil breviori tempore fortè absolvatur, altera tamen per retortam facta magnopere laborem haud adaugeat, imò salutarem spiritum largiendo, liberaliter hunc ipsum compenset. Si nihil spirituum proveniret, tunc oleum & operam esse perditam, rectius animadverteretur. Ubi verò copiosorem, spirituum proventum quis desiderat, specierum dosin augendo, facile obtinere scopum potest; præcipuè cum in unica antimonij libra sæpius pro hac operatione non subsistatur, sed pondus ipsius, & consequenter etiam nitri ac tartari, si hic unâ accedat, adaugeatur, ne labor, qui unâ vice absolvi poterat, brevi sit repetendus; idque eò magis, quia hoc medicamentum inter illa locum reperit, quæ per plures annos perdurant.

Cæterum de aluminis ustione idem *Zwelfero* objici posset; cum sæpius in exigua quantitate, libram semis non excedente, alumen uri, sive calcinari soleat; prout quoque *Augustani* pondus ejus non determinant, saltem, *quantum volueris*, urendum, esse, innuentes; *Zwelferus* tamen in alembico terreo vitreato hoc peragi posse, in genere admonet.

Imò posito, benè sic defendi *Zwelferum*; quid verò cum ejusdem *Regulo antimonij simplici*, quem pag. 364. *Mantiss. Spagy.* describit, fiet? ubi ad libram unam & dimidiam antimonij, ana libram unam nitri & tartari adhibet, inque aperto igne detonationem absolvit; quæ eadem nitri & tartari quantitas in dicto comuniter Clysto, ex iisdem ingredientibus composito, præscri-

præscribitur. Conferatur *Magnif. D. Guerney. Rolfincius in Chim. in artis formam redact. libr. 3. sect. 2. artic. 1. cap. 24.*

Quamvis nec in præsentí Antimonio diaphoretico *Zwelferi* tam exiguum tartari & nitri pondus poni, si benè res expendatur, dici debeat. Antimonij enim libræ, tartari itidem libra una, & nitri libræ duæ accedunt. Namque antimonij detonatio, novo semper addito nitro & tartaro, ter reiteratur. Omnis itaque illa specierum pro quatuor detonationibus necessaria- rum quantitas si jungatur, & unicâ (siquidem non minùs effi- cax ita evadit medicamentum; ut partita illa & toties reiterata detonatio labori saltem augendo inserviat) vice in retorta tu- bulata detonetur, oleum & operam perdi, nequaquam ampliùs dici potest.

II. *Zwelferus* prunis ardentibus, crucibulo injectis, species illas inspergere, docet, quod inconcinnum esse, censui; cum potius crucibulo prunis ardentibus imposito, inspergenda sint. Verùm, si benè laboraveris, utrumque modum succedere, *Dr. Hoffmannus* regerit. Succedere posse *Zwelferi* modum, non- contradico; inconcinnum tamen quid nihilominus in eo de- prehendo. Non enim video, quid laudabile à carbonibus cru- cibulo injectis sperari queat, nisi ut cinere inutili, si toti defla- grent, Antimonium diaphoreticum inquinent; sin toti non- deflagrent, pulvisculo suo nigro facilè diaphoretici hujus pul- veris candidum colorem defœdare possunt.

Aliàs carbonibus, crucibulo injectis, quòd species insper- gantur, à quoquam alio scriptum vel observatum fuisse, non- recordor. Materiam quidem crucibulo, mortario &c. immis- sam, admoto carbone ardente accendere, sicq; calcinare, non- nullos consuevisse, scio; sed illud huc non spectat.

III. Aquæ, pro edulcoratione Antimonij diaphoretici adhibita, præter salia, non exiguam Antimonij diaphoretici utilis

utilis partem inesse, eamque à *Zvelsero*, dum non perhibet, cui-
nam inservire usui debeat, vel planè abjici, vel saltem præfato
medicamento diaphoretico non conjungi, notavi. Ast nullum
esse dubium, respondet *Dn. Hoffmannus*, *Zvelserum* non abieci-
nitrum antimoniatum, sed vel pro singulari usu reservasse, vel
pro necessitatis ratione Antimonio diaphoretico denuo immi-
scuisse. Incerta cum hæc sint, transeant. Quidquid tamen
cum hoc egerit, vel agi voluerit *Zvelserus*, decuisset sanè ipsum,
in minimis aliàs notandis nimium curiosum, illud edocere, ne
fortè inutiliter profunderetur; imprimis cum paucos inveniri
sedulos & peritos Pharmacopœos, in *Extractorum animadversio-
nibus* exclamet.

IV. *Zvelserus* Antimonium diaphoreticum jam paratum,
per duas vel tres horas denuo igni committit, ut majorem fixi-
tatem & vim adstrictivam ipsi conciliet. Majorem hoc modo
vim adstrictivam medicamento huic conciliari, quòd non benè
dicatur, objeci; cum non adstrictiva, sed resolutiva potius in
eo desideretur; unde etiam ad sudorem pellendum in usum
trahatur. Verùm arti medicæ nullum inferre absurdum, à
Dn. D. Hoffmanno regeritur, unum idemque medicamentum
pro certo respectu adstringere & simul etiam aperire ac sudo-
rem pellere; quod nonnullorum medicamentorum exemplo
probat, & quomodo Antimonium diaphoreticum agat, proli-
xè deducit. Mihi solum notare libet, quòd nunquam dubita-
verim, dari medicamenta, quæ & aperiendi & adstringendi vi-
res possideant; neque etiam, quòd diaphoreticus hic pulvis
adstringere quandoque possit; sed innuere tantum volui, non
tam adstrictivam virtutem, quàm resolutivam & diaphoreti-
cam in eo expeti, unde quoque nomen fuit sortitum; & com-
muniter non tam ad astringendum, quàm potius sudoris ex-
pulsionem præscribi & adhiberi. Idcirco magis à potiori ac
notiori

notiori ratio petenda fuisset. Hinc ipse *Zwelferus* Antimonium diaphoreticum, si aëri exponatur, aut diu adservatum fuerit, cum tempore ad genium pristinum redire, pag. 96. *Pharmacop. Reg.* scribit, adeo ut parva in dosi exhibitum, pro *diaphoresi* concilianda, cor potius adficiat &c. Et *Mantiss. Spagy.* pag. 367 eundem pulverem, auri accessione cariorem redditum, in crucibulo tribus vel quatuor horis igne aperto moderatè calcinare præcipit, ad majorem fixitatem & vim *sudoriferam* & alexiphar-
macam ipsi conciliandam.

Utrùm verò majorem fixitatem & virtutem denuo ita calcinatum adquirat, meritò dubitatur? Sufficit, quòd satis fixum & efficax, absque illa repetita calcinatione, esse, experientia certi reddamur.

V. *Zwelferus* tartari additionem pro antimonij hujus præparatione utilem censet. Carere tamen eâ facilè nos posse, animadverti; quia 1. cum solo nitro paratum non minùs efficax existat. 2. à tartaro cineres aliqui ipsi commisceantur. Verùm quoad prius, experientiam contradicere, *Dn. Hoffmannus* objicit; qua constet, illud cum tartaro paratum majorem vim adstrictivam & fixitatem nancisci, atque illud cum nitro solùm elaboratum. Cineres autem, si qui commisceantur, à nitro deflagrante consumi, & à sulphure antimonij absorberi. Sed 1. quæ experientia ista sit, & quomodo experimenta, è quibus illa tandem orta, fuerint instituta, nescio. Taliter quidem, cum tartaro scilicet, paratum, esse medicamentum salutare, efficax & tutum, ab experientia fuisse comprobatum, minimè contradixi. Ast salutarius illo, cum solo nitro elaborato, sic evadere, persuadere mihi non prius possum, quàm id clariùs demonstretur.

2. Commisceri à tartaro emortuam terram sive cinerem, negari nequit, nec *Zwelferus* ipse negavit; hunc verò à nitro non
K
consu-

consumi, videbitur, modò quis tartarum nitro permixtum detonationi committere velit; ex impetrata enim massa post salis elixivationem, eadem terra, à nitro non consumpta remanebit. Sin ab antimonij sulphure absorbeatur, vel corpusculis Antimonij diaphoretici, à quibus discerni ob utriusque albedinem nequit, permisceatur, cum terra sit emortua, nec aliquem usum hîc præstare valeat, rectius non adjungitur; quod fiet, si tartarus omittatur; præsertim ubi purum medicamentum desideratur.

VI. Cum partes crassiores, in edulcoratione pulveris nostri fundum citò perentes, abjicere *Zwelferus* præcipiat; pulvis autem hic effectus non sit, subsecuturæ alteri alicui Antimonij diaphoretici præparationi reservari eum posse, animadverti. Ubi *Dn. Hoffmannus* judicat, si partes crassiores purè antimonialles sint, nec sordibus scateant, exiguum ex his oriri dispendium; per se tamen licere vel reservare easdem, vel secus; si autem impuræ fuerint & sordidæ, quivis sanè, addit, abjiciet. De impuris, quòd abjiciendæ sint, controversiam illam non volui movere, sed de puris antimonialibus; præsupponens, eum, pharmacum hoc qui paraturus est, omnia nitidè, ut decet, esse peracturum. Et quanquam hæ magna in copia fundum non peterent, paucas tamen istas colligere & reservare, uti facillimo labore fieri potest: ita abjicere easdem non licet, si quis vel exiguum etiam damnum, *Zwelferi* ad exemplum, præcavere velit.

VII. Sinistrum vocavi *Zwelferi*, præceptam ab *Augustanis* filtrationem perperam institui, animadvertentis judicium, quòd nempe verum Antimonium diaphoreticum per chartam non transeat. Siquidem *Augustani* probè norunt, pulverem antimonij diaphoreticum, post massæ calcinatæ edulcorationem, oculis se offerentem, per filtrum non, subtiliorem tamen eius partem,

partem, salibus solutis junctam, transire, quæ dein tractu temporis sponte subsidet, atque ab aceto destillato in fundum agitur. Verùm *r. Zvelseri* in *Augustanos* censuram justo adhuc stare alo, *D. Hoffmannus* existimat; cùm revera calens decoctum per filtrum esse transmittendum, & loco frigido relinquendum, ut id, quod subtilius, solvatur, tandemque in pulverem, albicantem præcipitetur &c. Ipsi præcipiant. *Si enim, pergit, hæc vera ipsorum non esset mens, cur adderent, quod si acetum destillatum immittatur in idem decoctum filtratum, facilius & celerius pulvis iste cadit majorum virtutum : Ubi differentiam faciunt inter pulverem illum, qui sponte subsidet, (nec alterius mentionem faciunt, qui per filtrum non transit,) & eum ab aceto destillato præcipitatum.* Ast tanti roboris hæc non sunt, ut vacillantis *Zvelseri* judicium fulcire sufficienter queant. Minimè negatur, *Augustanos* pulveris Antimonij diaphoretici, qui filtrum non penetrat, specialem mentionem haud fecisse, sed illius solùm, qui chartam bibulam, transit; non quòd omnem chartæ poros sic permeare, aut partem, quæ permeat, Antimonium diaphoreticum saltem esse, crediderint, sed potius, ut partem ejusdem subtiliorem, quæ vel separatim adservatur, vel etiam reliquo postmodum permiscetur, quoque acquirerent. Unde noranter addunt : per ebullitionem id quod subtilius (non omnis materia calcinata & coctioni commissa) in aqua solvitur, & tandem (post filtrationem) præcipitatur. Illud enim subtilius, quod solvitur, aliud superesse, indicat, quod non æquè subtile, nec solutioni huic aptum existit. Specialem verò hujus mentionem quòd non faciant, ideo fieri verisimile est, quia sponte oculis sese exhibet, atque vulgare esse Antimonium diaphoreticum, Ipsis quoque in usum vocari solitum, jam antea est notissimum; cùm econtra alter ille subtilis pulvisculus non æquè oculos incurrat, nisi ulterior ipsi manifestando opera locetur. Differentiam

itaque faciunt: 1. inter pulverem illum non adeo subtilem, nec in aqua cum salibus solubilem, aut chartam emporeticam permeantem, utilem tamen; 2. qui hanc transit, subtiliorem & sponte subsidentem; ac 3. ab aceto destillato præcipitatum; qui duo tamen pro uno eodemque habentur; unde secundum illum facilius & celerius in fundum cadere, scribunt, si decocto filtrato acetum destillatum infundatur.

2. Subtiliorem hanc partem per acetum destillatum præcipitatum toto cælo differre ab illo pulvere, qui filtrum non transit, objicit *D. D. Hoffmannus*; cum alia sit ejus partium textura & figura aquæ poros implentium, plus de sulphure antimonij, quàm nitro participantium, alius etiam ejus sit effectus, dum in copia adsumtus à ʒss. ad 3ss. vomitum cieat, imò in omni non reperiatur aqua, ab Antimonio diaphoretico separata, imprimis si sulphur antimonij cum nitro justò deflagravit, parum vel nihil ejus adquiri, præsertim non calidâ, sed frigidâ adhibita aquâ fontanâ. Adeoque calcem hanc nihil aliud esse concludit, quàm mutilum sulphur antimonij, quod nitri actiones fixativas subterfugit, & in poros aquæ sese insinuavit; illum autem pulverem, qui filtrum non transit, optimum esse Antimonium diaphoreticum, cujus virtus non tam à sulphure antimonij, quàm nitro, quod abunde in antimonio figitur, ut ponderis incrementum edocet, dependeat. Differre aliquo modo pulveres jam recensitos, non est dubium, sed quòd toto cælo differant, non consentio.

Aliàs 2. quæ hujus vel illius sit partium textura & figura, ob quam inter se discrepent, me non intelligere, fateor, cupidus eam edoceri.

2. filtrum transientem pulverem plus de sulphure antimonij, quàm nitro participare, concedo; idem tamen de reliquo pariter, in filtro qui restitat, esse prædicandum, existimo;
imprimis

imprimis cum antimonij medicamento huic deputata dosis, post absolutum calcinationis &c. laborem, nonnihil quidem in pondere adaucta resultet, neutiquam verò eousque adscendat, ut nitri plus, quàm antimonij, inesse dicere liceat, cum aliàs v. gr. antimonij crudi libra una, diaphoretici libras duas &c. suppeditare deberet; quod non esse sperandum, ipsa *Antimonij* edocer.

3. Effectu inter se differre, itidem non contradico; non quòd subtilior iste pulvis, loco virtutis diaphoreticæ, emeticam vim possideat; sed quòd altero illo præstantior sit, cum in minori dosi eundem effectum largiatur. Vomitus quandoque posse usum ejus insequi, non difficeor; sed tunc & ille in filtro remanens pulvis eidem culpæ foret obnoxius, si scilicet ritè non fuerint præparati, aut aliam ob causam nausea vel vomitus fortè superveniat. Aliàs sine vomitus metu aut periculo tam hunc, quàm illum agere, per plurima experimenta compertum habemus.

Quin si magisterium hoc culpari & eliminari meretur, certè *Antimonium diaphoreticum tartarifatum*, pag. 307. à D. Hoffmanno descriptum, eidem periculo est expositum; quod enim sal tartari ab Antimonij diaphoretici sulphure in calcinatione arripuit, illud per adfusum vitrioli spiritum præcipitatur. Et tamen diaphoreticam, aperitivam & diureticam vim habere, sicque præstans esse medicamentum, conceditur.

4. Mihi hætenus pulverem istum ex aqua separare, semper licuit. Aliis contrarium contigisse, præfractè non nego; si v. gr. frigida aqua, vel copiosa massæ adfusa, aliquandiu supra hanc steterit, pulverem non præcipitari posse, est credibile; prout etiam si acetum destillatum immittatur, atque ab illo non statim descendere pulverem quis videat, nihil planè amplius præcipitatum ita, fortè posset credere; cum tamen, si re-

ponatur, sensim sensimque subtilissimus pulvisculus compareat atque subsideat.

Utrum virtus Antimonij diaphoretici non tam ab antimonio, quàm nitro dependeat, certi quid determinare, difficile admodum erit. Mihi, ab utroque symbolum aliquod conferri, credibile videtur. Licet enim de nitro inibi quid figatur, ei soli propterea virtus omnis, vel saltem potior ipsius pars, assignari haud potest.

VIII. Denique in illo, quod de medicamine hocce, naturam pristinam tractu temporis readsumente habet, à *Zvelferi* partibus recedit, mecumque, per plures annos absque ulla noxa, si ritè præparatum fuerit, ægrotis propinari id posse, consentit.

CAPUT XIV,

de Lacte sulphuris.

DE Magisterio, sive Lacte sulphuris hanc *Zvelferus* pag. 450. *animadvers.* fert sententiam: *ut ab aliorum Magisteriorum præparationibus parùm aut nihil differt: ita nullam præ iis singularem meretur laudem.* De aliorum autem indiguitatis præparationibus judicat, quòd reddant calces emortuas, inutiles & insolubiles. Qua in re dissentire à *Zvelfero*, æquum fuit, videlicet Lac sulphuris non esse calcem inutilem, aut non solubilem. Sed *Cl. Zvelferus l. c.* sic *Dn. Frider. Hoffmannus* pag. 372. objicit, *non ita loquitur, ac si omnes omnino virtutes huic lacti derogare velit, sed hoc saltem dicit, quod vel crudum sulphur vel ipsius flores sublimati longè majoribus virtutibus polleant, quam hoc ipsum iac sulphuris tanto labore comparatum.* Verum est, *Zvelferum* in *Mantiß. spagyr.* cautiùs processisse, & sulphur pro maxima sui parte saltem destrui in hac operatione, notasse; prout idem pag. 517. *Pharmacop. Augustan.*

gustan. Restit. fideliter monui; sed quòd loco cit. nempe pag. 450. animadvers. diversam ab hac sententiam foveat, ex adductis modò ejus verbis demonstravi, & contra illam quoque decertavi. Tunc itaque, ubi *Augustanos* reformandos sibi proposuit, Lac sulphuris parum aut nihil ab aliorum Magisteriorum præparationibus differre, & consequenter etiam aliam, quàm hæc, non mereri laudem, id est, esse calcem emortuam, atque inutilem, animadvertit; postea verò, ubi fervor ille in *Augustanos*, cùm ultima *Pharmacopœje Regiæ* editio adornaretur, nonnihil fortè deferbuit, magis consentanea veritati utique scripsit, dum non totaliter destrui, sed partem aliquam viribus salvam remanere, concessit. Rectè igitur animadversioni *Zvelferianæ* in *Dispensatorij Augustani* Lac sulphuris prolata me contradixisse, inconcussum manet.

Nec saltem, quòd vel crudum sulphur, vel ipsius flores longè præpolleant Lacti tanto labore comparato, *Zvelferus* in animadversionibus suis scribit; sed parum vel nihil, nihil, inquam, ab inutilibus jam reputatis Magisteriis Lac istud differre, unà animadvertit.

Præterea sulphuris Magisterium vix terciâ sui parte sulphur, reliquas autem duas calcem emortuam atque inutilem esse, ex sublimatione ejus elucescere, cùm *Zvelfero*, *Dn. Hoffmannus* adserit. Sublimatione quidem vix terciam partem elevari, cùm eam nunquam tentaverim, haud negabo; in memoriam tamen unà revoco, quod *Dn. Hoffmannus* pag. 657. de cornu cervi usto, ex quo nullum sal volatile, à quo aliàs cornu cervini virtutes dependere creduntur, destillatione vel sublimatione elici potest, hunc in modum eloquitur: *Licet particula salina cum sulphureis videantur destructa, tamen nihil obstat, alia enim est ignis, alia Archæi stomachici est operatio cum remediij adaptatione, quam nullus intellectus humanus satis assequi potest.* Sic licet sulphur in
ejus

ejus lacte parando videatur destrui, dum scilicet sublimatione non totum postea adscendit, nihil tamen obstat; alia enim est ignis, alia Archei stomachici operatio &c.

Caterùm præter illam traditam sublimationem, *Zwelferus* quoque Lactis istius, simpliciter saltem Vulcano commissi, unam tantum partem absumi, (quod tamen *Dn. D. Hoffmannus* silentio præterit,) duas verò remanere, inquit; id quod *pag. cit.* negavi, experimentis utpote contrarium edoctus; remanet scilicet à combustione pulvisculus, (prout à crudi sulphuris combustionem aliquis etiam reperitur,) tertiam tamen partem Lactis sulphurei, combustionem traditi, multò minùs duas tertias, haud adæquat; sic ut maxima pars, crudi instar sulphuris, deflagret; atque ita duæ tertiæ in Lacte sulphuris pro calce destructa & effocta neutiquam venditari queant. Plura videri possunt in *Pharmacopæia Augustana Restituta*.

CAPUT XV,

de Coriandro præparato.

Coriandrum qua ratione nocere queat, *pag. 425. 63c. Pharmacop. Augustan. Restit.* explicatum fuit; quod propriè sic dicta inter venena à *Zwelfero* referri, ut adsererem, nunquam in mentem venit. Prout etiam qualitatem ejus noxiam arescentiâ emendari posse, & cur, ac quomodo semen hoc præparetur, nec non quid de *Zwelferi* in istam præparationem animadversione statuendum sit, ibidem exposui. Sed *Dn. Hoffmanno* iterum à *Zwelferi* partibus hîc stare, *pag. 453.* libuit; licet divortium ab eodem facere, mihi què aliquantum ad stipulari non planè recusaverit; *Zwelferus* enim *animadvers. pag. 410.* in illa ab *Augustanis* tradita præparatione, totam coriandri vim, carminativam & balsamicam unâ cum aceto exhalare, censet; quod

quod falsum esse, judicavi, aliqualem solùm virium jacturam fieri, concedens; *Dn. Hoffmannus* autem potiore (non totâ, quod *Zvelserus* vult,) suâ virtute carminativâ & spirituosâ spoliari coriandrum, statuit.

Fundamentum verò hujus sententiæ, quod producit, per mechanicam nempe experientiam edoceri posse, partes oleosâs, volatiles, ac spirituosâs ab aceto figi, & in aliud ens traduci, quomodo ritè explicare, ac *Domini Autoris* mentem adsequi possim, hæreo. Interim partes oleosâs, volatiles ac spirituosâs vegetabilis hujus ita ab aceto figi ac transmutari, haud existimo, ut nativæ ejus virtutes unâ ligentur, ac virtutem suam amittant; quia aliâs pari jure *Aceta medicata*, rebus oleosis, volatilibus ac spirituosâs imbuta, rejici deberent; cùm tamen nativas vegetabilium horum infusorum virtutes salvas inibi manere, & Practicorum experientia testetur, & ipse *D. Hoffmannus* *Aceta medicata* non rejiciat, imò pag. 381. *Metb. med. Acetum antipestilential* egregiè commendat.

Sed omnium optimè coriandrum debitè, modicâ scilicet cum aceti quantitate, & leni calore præparatum, seipsum defendit; cùm & odore & sapore, naribus ac linguæ fidem de olei balsamici præsentia ubertim faciat.

C A P U T X V I,

de Scillæ præparatione.

DE radice scillæ præparatione *Zvelseri animadvers. pag. 219. & Pharmacop. August. Reſtit. pag. 449. consulere, Dn. Hoffmannus pag. 547. præcipit, addens: in quo tamen sententiarum districtu primas Cl. Zvelsero semper deferimus, quia hæc in clibano cum massa panis factâ coctione non potest non Scilla nativâ suâ humiditate, b. e. sale volatili specifico innato privari, residuis partibus terreſtri-

L

bus*

bus amaris; quicquid contra regerat Schröckius, non tamen satisfacit. Mihi, de scillæ præparatione non tantum *Zvelseri* animadvers. pag. 219. sed etiam pag. 419. & præter *Pharmacop. Augustan. Reslit.* pag. 449. ejusdem quoque pag. 200. &c. evolvendas esse, monere libet. Qua ratione autem, & quo jure primas hoc nostro incertamine semper *Zvelsero* deferat *Dn. Hoffmannus*, jam dispiciam, & argumentorum meorum præcipua, cum nimis generaliter ac nudè objiciat, me non satisfacere *Zvelsero*, quidquid regeram, breviter ruminabo.

1. *Zvelserus* scillæ præparationem non necessariam esse putat, quia *Galenus* succum scillæ, diebus canicularibus exceptum, in *Loboch de succo scillæ* recipiat, non verò succum scillæ assatæ. Respondi: 1. Scillæ præparationem non tanquam adeo necessariam, sed tot seculis usitatam, simulque salutarem, *Augustanos* tradere. 2. Succum scillæ crudæ non excludere, usum præparatæ; & sic 3. *Galenum*, si crudam in *Loboch de scilla* adhiberet, assatam tamen etiam usurpasse. 4. *Galenum* tamen non crudam, sed præparatam pro dicto medicamento adhibuisse.

2. *Zvelserus* necessitatem hujus præparationis negat, quia pasta, in qua scilla fuit assata, non sit venenata. Sed præparationes medicamentorum non soli venenatæ qualitati simplicium medicamentorum destinari, verum institui quoque alium in finem, regeſſi.

3. Scillam exsiccatam admodum in pondere diminui, cum nativâ suâ humiditate sic spoliatur; hinc etiam totali suâ essentiâ & substantiâ privari, ut nil nisi viribus exhaustæ membranulæ remaneant, *Zvelserus* objicit. Concentrari per exsiccationem istam scillæ virtutem, humiditate scilicet aqueâ ablatâ; membranulas autem remanentes, totali suâ substantiâ scillam non esse privatam, indicare; saporem quoque acrem nonni-

nonnihil & amarum in exsiccatis membranulis superstitem, non omnibus has exhaustas esse viribus, docere; nativam insuper humiditatem, quæ separatur, proximè ad elementaris aquæ naturam, narium judicio, accedere reposui.

4. *Zvelserus* scillas marinas Italicas mordacitate & exurenti malignitate esse præditas, notat; quæ mordacitas præparatione hac ex parte diminuatur. Cum verò *Augusta* ut plurimum scillis marinis, Venetiis huc delatis, utamur, ideo rectè *Augustanos* earum præparationem tradidisse, concludi.

5. Licet *Zvelserus* pag. 219. animadvert. scillas nativâ suâ humiditate spoliari, viribus etiam planè exhaustiri in præparatione ista, tradat, pag. tamen 419. per scillæ præparationem, ejus mordacitatem, à qua virium originem deducit, ex parte diminui, non verò totaliter auferri, scribit; ipse etiam scillam præparatam pag. 4 7. 108. & 111. *Pharmacop. Reg.* medicamenti suis adhibet. Unde si hæc de scillæ præparatione vera sint, scillam exsiccata, viribus non esse planè exhaustam, contra *Zvelserum* concludo.

Quàm pauca verò *D. Hoffmannus* pro *Zvelseri* sic reformati partibus defendendis proferat, paulò ante adducta ipsius verba si conferantur, facile patebit. Unde meis objectionibus nondum esse satisfactum, regerere teneor.

Nunc *Domini Hoffmanni* rationes, ob quas *Zvelsero* primas in hoc certamine semper deferat, parumper intueamur: 1. hac in clibano cum massa panis coctione scillam non posse non. nativâ suâ humiditate privari, objicit. Ast scillam massæ panis inclusam, post coctionem in clibano factam, satis humidam esse, observatur, ipseque *Zvelserus* in *Trochiscorum de scilla examine*, fatetur; quæ humiditas, licet aliquid de massa prædicta accedere ipsi queat, majori tamen ex parte scillæ debetur. *Zvelserus* itaque dum scillam in præparatione spoliari nativâ suâ hu-

miditate, urget, non de illa in clibano saltem cocta, sed postea etiam exsiccata loquitur.

2. Nativam humiditatem *Dn. Hoffmannus* sal volatile specificum innatum interpretatur. Sed præterquam quod nativa scillæ humiditas & ejus sal volatile non sint eadem; cum humiditate tamen illa aquea salis volatilil aliquam fieri jacturam, (modò herbaceus propemodum odor ille, quem solum, absque alio, salis volatilil præsentiam arguente indicio, in aquâ, ex scilla recenti, dum hæc scribo, destillatâ observavi, sal volatile dici mereatur,) non ibo inficias; quod tamen perpaucum esse, superiùs monui.

Accedit, quòd scilla præparata sive exsiccata, si aquâ superinfusâ destilletur, hanc odore pariter herbaceo imburam dimittat, sicque clarè satis testetur, non omne suum sal volatile in priori exsiccatione fuisse ablatum.

Imò scilla præparata si comburatur, inque cineres redigatur, ab hisce, ubi degustantur, mox lingua, ob sal ipsis inhærens vellicatur; atque hoc idem sal elixiviatum cum acidis effervesceat; Adeoque ex his fundamentis ad alcalium fixorum classem referri meretur. Jam verò alcalia fixa ex sale volatili & acido per ignem produci, *Dn. Hoffmannus* cum *Helmontio* aliisq; statuit. Si itaque è scilla exsiccata vel præparata alcali fixum educitur, sal volatile in ipsa præexistisse, utique concedi debet. Ucalia, quæ hujus volatilil partis præsentiam demonstrant, jam silentio præteream.

Neque etiam ob humiditatis illius separationem, scillæ præparatio, vel exsiccatio culpanda ac planè rejicienda est; cum aliàs vix ullum aliquod vegetabile, imprimis quod est aromaticæ naturæ, fragrantique odore pollet, exsiccari deberet, quia nonnihil salis volatilil, vel partis spirituosa, ceu odor exhalans testatur, tali ratione amittitur; quam tamen exsiccationem

tionem nemo hactenus, neque *Dn. Hoffmannus*, improbavit, aut non commendavit.

3. Sal volatile specificum innatum amitti, residuas verò partes terrestres amaras esse, *Dn. Hoffmannus* scribit; ubi quidem, si pariter *Zvelsero* primas deferat, has partes terrestres amaras viribus exhaustas esse, statuere tenetur; cum tamen non destitui eas viribus, per experientiam hactenus innoverit. Videturque, ab amara hac scillæ qualitate vim ejus agendi non parum proficisci, utpote cujus ratione incidendi & aperiendi virtutes, in scilla præcipuè prædicatas, exserit. Et palato ingrata illa amarities si effocta viribusque vacua existit, malè cum ægrotis, aliàs ut plurimum medicamenta fastidientibus, agitur, quòd diversis in medicamentis hæc ipsis exhibeatur, & non potius separata tantum humiditas, quæ sal volatile esse debet; relicto sic effocto, nauseoso, amaro corpore, propinetur. Absinthij &c. partes terrestres, amaras, non inutiles censet cum *Zvelsero Dn. Hoffmannus*; cur ergo similes in scilla occurrentes solum effoctæ & inuciles sunt reputandæ?

CAPUT XVII, *de Opij correctione.*

TAndem in *Zvelseri* tutelam de noxia opij qualitate quod profert *Dn. Hoffmannus*, meo quoque examini opponere, videtur, dum venenum sive virus opij, quod tostione evanescere *Zvelserus* voluit, negavi. Sic autem *Dn. D. Hoffmannus* pag. 593. de fermentatione opij cum succo cydoniorum agens, scribit: *Ubi, si quis corpori humano noxiam qualitatem opij ex sulphure ejus volatili ac fetido emanantem forsan in dubium vocare velit elaborando hunc processum proprio expertus damno, cautior in posterum in contradicendo & refutando Cl. Zvelserum fiet.* Ubi itaque hac in materia contradixerim, & quomodo *Zvelserum* refutaverim, ne-

cessum est, ut aliqua jam repetam. *Zvelserus* opij tostionem commendat, ut sulphur narcoticum ipsius, immodicum, nocivum, foetidum & venenatum exhalet. Quæ si pro Synonymis habeantur, litem ampliùs *Zvelsero* haud moveo, sed sulphur illud venenatum esse, largior; non quòd propriè venenatum existat, sed tantùm quatenus immoderatè ac inconsideratè adhibetur. Verùm posito hoc, annon ita òmnis ista tostio, tanquam non necessaria & deprædatoria meritò rejicitur, cùm sulphur narcoticum, cui virtutem suam, à Medicis expetitam, debet opium, ut sic in auras abeat, quæratur?

Sin propriè venenatum esse sulphur illud, dicatur, interrogatos velim adferti hujus *Zvelseriani* Patronos: quibus fundamentis sententiam hanc fulcire queant? Siquidem *Dn. Hoffmanni* ratio nihil hic efficit. Licet enim exhalans in fermentatione opij cum succo cydoniorum factâ, Gas, nimium ejus respirando haurientibus, imprimis si debili capite hi sint præditi, damnum, sive quod *Excell. Dn. D. Langelotto* accidit, obtusum capitis dolorem cum somnolentia inducat, venenatum tamen propterea dici nequit. Quis mustum & cerevisiam venenata diceret; cùm & ipsa, dum in cella vel loco aliquo clauso fervent sive fermentantur, non tantùm dolores capitis, sed suffocationem extremumque somnum inducant; ceu plurimæ Medicorum observationes id testantur? Non mirum itaque est, obtusum capitis dolorem & somnolentiam à tam potentis medicamenti narcotici, præcipuè si magna ejus quantitas fermentationi cum succo cydoniorum, in loco præterea clauso, tradatur, exhalante spiritu concitari.

Alia quæ *Zvelseri* refutandi causâ fuerunt à me prolata, nec à quoquam hætenus refutata, nolo hîc repetere, sed videri in *Pharmac. Aug. Rescit. pag. 138. 139. 140.* posse, moneo, simulque amicæ huic Disceptrationi finem impono.



